



ՀԻՇՈՂՈՒԹՅՈՒՆՆԵՐԻ

ՀԵՏԱԳԻԾԸ

ՆՈՐԱՅՈՂ

Երբ հմուտ ոսկերիչը ավարտում է ստեղծագործ շրթան, փականը չի տեղադրում՝ հուսալով, որ համալրում է լինելու. ոսկե օղակները դեռ պիտի ամբողջացնեն, շարունակելի դարձնեն այն և ունենա կախազարդեր: Այս զգացողությունն ունեցա Նեկտար Սիմոնի «Իմ աղեն» երկրորդ գրքի հայտնության համար, որ պիտի արձակագիրը հեռանա նախորդ ծանոթ ու հարազատ արահետներից և բռնի վերելքի իր նոր ճամփան, ստորոտից հասնի մինչև բուրգ:

Նյութաբանության հագեցվածությունը զարմանալի է ու վերծիգ:

«Իմ աղեն» ժամանակային էվոլյուցիա ունի. այստեղ հասուն կնոջ անդրադարձն է դեպի անցյալ, երբ ծաղկափեշ, գյուղական կոլորիտով պստիկ աղջիկը տարիներ անց դառնում է ազնվականության հովերով մի տիկին, ով այդ դիտակետից է խոսում իր աղբի մասին՝ նույնչափ անկեղծ ու խոսքաշատ, նվիրյալ ու արվեստով, ինչպես նախնականության մեջ էր: Գրքի շնչառությունը համաչափ է, անփոփոխ:

Աղբի իմաստության, խոհականության, միամտության, հումորի ու ցավի հյուսվածքների շարահյուսական կապը մնում է առանցքային, գերազանհատելի՝ առաջին սանդղակից մինչև վերջինը:

Նեկտարի աղեն պատգամ ուներ: «Սիմոնիս պզդիկ աղջիկ, դու հիշե, օր աղբի մնացած կյանքը կըշարունակվի քու մեջը, քու մտկերի, ուրեղ օր աղեն գիշերները գույներ կըհնարեր ու փուչիզների պես կախ կուղար պլակացող աստղերից»:

Այո՛, մտքային հոսքը չէր կարող կանգ առնել հուշերի վարարումների առաջ: Նյութերի անճիգ մատուցումները՝ առանց խաղ ու դիմակի, գտնում են հոգու ճամփան և ցուցանում գեղեցիկ կեանքները:

Հեղինակի ներաշխարհի հնոցում չկան մտքային կիսահույս հացեր: Նրանք վերարտադրում են մենախոսության պես: «Բալա՛ ջան,- ասում էր աղեն,- վախտ կա, կըմդածեմ՝ ինչն օր սրդիս կամկով էրի, հարի հըմի ընծի տաքություն կուդա, ինչն օր խելքիս հաշվին էր, պաղությունից կըմրսիմ: Սաղ աբրածս կյանքը կռիվ տվի մդկիս ու սրդիս հետ, եղավ ըմբես, օր կայնա ու մնացի իրանց մեջտեղը»:

Արագգեղի աղեն իր հիշողությունների սնդուկն էր որպես կտակ ու որդեգիր հանձնել թոռնուհուն, որտեղ ցավ կար, ճշտի ու սխալի վերարտադրում, հայրենակարոտ, որը ստիպում էր Եղսոյին միշտ ետ նայել: Այդ սնդուկի բանալին հանձնել էր Նեկտարին, ով հաճախ պիտի արևերես հաներ աղբի հիշողությունների թանկությունները՝ որպես մասունքներ: Ամեն բարդ երևույթից մինչև հոգեհմա պարզություն, հեղինակը մատուցում է բարձրագույն արվեստով:

Արագգեղը ստեղծագործական առանցք է, որի շուրջը պտտվում են վերհուշի ապրումները և բառերն ունենում են գունային թռիչքներ:

«Օր ըմբես եղնի՛ եղ երտանք, հեջ մե սելըմ չեմ նստի, ողներս թող քեւան ջայելավարի, հողը պաշելով ճամպեթի ծաղգուկը կըհավաքեմ, փուց կենեմ ծոցիս վրա ու կըերգեմ աղջիգ վախտվա պես: «Ջան Գյուլումի» տոն կըսարքեմ, ու իմ գեղի սարերը կըհասկնամ, օր ըղիգ Եղսոյի ձենն է...»

Արխելույս կարել եմ Օսկե կոջակ շարել եմ»:

Նեկտար Սիմոնիի պատմվածաշարն ունի ճիշտ ապրելու բանաձև, յուրատիպ քարտեզագրություն, և այդ կենսագրությունների խորքում արդար ապրելու կանոնագրքեր կան: Աղեն ասում էր. «Ընծի կըթվա, թե ջանիս մեջը մե հին դուտիզըմ կաբրի, օր վախտ-վախտ կըբացվի, օր չիեղդիմ, հեղո նորից կըփազվի: Իսկական Եղսոն ըղիկ է, էդ դառնալ ու լիքը դուտիզն է. Եղի է իմ ճշտի աչքերը»:

Ներքին էներգիայով լի, իր ապրածի եղելությանը աղեն սովորական երևույթներին տալիս էր գեղարվեստի ինքնատիպ բացառիկություն:

«Ես անաստված դառնող ընծի սորվեցրավ քեփլդալով յոլա երտալ: Տարին տարուն ըմբես եղավ, օր իրա հեղ սեղան նստա, իրան գիրգս առած՝ բիլամ ծիծղացի: Կսեն դառնող մարդուն կըվեճեմ»:

Հըմի գուզեմ հարցնեմ իմ բախտին՝ քանի՞ անհաշիվ տարիք ունիմ: Վայտե կերտա իմ անցավորներիցս էլ կանցնի»:

Երբեմն թվում է՝ գրքի հեղինակը նկարիչ է, և կտավում է անաղարտ բնությունը հենց աղեյական աչքերով: Գյուղաշխարհի պատկերումը ստեղծագործողի անխալ ձեռագիրն է, արժանիքը, որտեղ շարժում կա, փիլիսոփա-

յություն, սեր ու կարոտ:

Ծառի, թփի, քարի, փշի հետ խոսող աղեն, մայրության խորհրդանիշ աղեն, մինչև իր կյանքի վերջին օրը մնաց Արագգեղի բնակիչ, թեպետ վտարանդի հայի ճակատագիրը նրան ուրիշ ափ տարավ:

«Բալա՛ ջան, իմ Արագգեղի վարդերի փնջեմու փուշն ուրիշ էր, օր կըծագեր, համայրա թե չէր մըմռա, միմազ կըտաքեմար էդ խածած տեղը, քիչըմ պաղ ջուր կըքսե՛ր՝ կանցներ: Ախ, էդ կարմիր գոնձոճ գլխով գոռոզ փշերը»:

Փշերն էլ մարդկանց պես ունին իրանց տարբեր ճակատագրերը, իրանք են հողին կընմանվին, որի վրա օր կըբուսնին»:

Ամեն մի ժամանակ իր թելադրանքն ունի, բայց բայլող հուշարձան կմնա Արագգեղի Եղսոն բուրդ տարիների համար՝ իր ճշտով ու իմաստությամբ, կոլորիտով ու կերպարային յուրատիպությամբ:

Նեկտարը հրաշալիորեն է կերտել նրա բացառիկ կերպարը, որը խտացում է նույն ժամանակի բուրդ աղենների: Այնտեղ է ապրում աշխարհի միամիտ ու անզարդ ճշարտությունը:

Գիրքն իր որակական արժեքներով ունի դասականության կնիք և հայ գրականության լավագույն էջերից է: «Իմ աղեն» զգայական պատկերացումների ֆոնին կուսնենա հիշողությունների անցքի ու մնայուն դաշվածքներ, որոնք ի պահ կտրվեն գալիք սերունդներին: Բարի ընթերցում:

ՀՈՒԹՍԻՍԷ

ՎԵՐՅՈՒՇ

Այո՛, հիշողությունները հաճախ հրեշտակաթև թռչունների պես սահում են հայացքիդ առջևով և դու գնում ես նրանց ետևից, երբեմն էլ կանգնում ես հուշի փակ դռան առաջ, նայում կողպեքին, պատեցնում ես բանալին ու ներս մտնում՝ մուտքի առաջ թողնելով կոշիկներդ, որ ճանապարհի փոշին մնա դրսում: Ժամանակի չխուճացած իրողությունները սկսում են շնչավորվել:

Երբեք չեմ մոռանա այն օրը, երբ Աղենի հետ ոտքով գնում էինք Անի կայարան: Մեր գյուղից մեկ ժամվա ճանապարհ էր:

Ինչպես միշտ, իմ աղեն կանգ առավ և իր տանջված, ծերունական հայացքով սկսեց նայել



երկաթգծի երկարությամբ ձգվող բարձր ժայռերին: Ինձ միշտ թվում էր, որ նրանք սարերի թիկունքն են, որ առանց այդ քարեղեն հսկաների փուլ կգան:

- Աղե՛ ջան,- հարցրի,- ամեն անգամ կայարան գնալիս ինչո՞ւ ես հենց այստեղ կանգնում:

- Բալա՛ ջան, ինչքի չըկայնիմ, դու հըլը ես ժեռերին աշե, իրանց երեսի ամեն մե սանտիմետրին վրա հազար ու մե փոք կա. էդ ամենքը իրանց կնճիռներն են, ըղիգ իրանց նեսի տարիների դարդն ու ցավն են: Ո՛վ գիդե՛ քանի անհաշվելի տարվա կյանք է ամեն մե փոթիմ մեջը: Հըլը էն ցածի ժեռին աշե, գույնը սևին կուդա, կըտեսնի՞ս, արցունքի կաթիլները սրդից կըթափին, ճաքերի մեջը լող կուդան: Էն մեծտեղի ժեռին աշե, երեսը դեղնին կըզարգե, կերևա, օր արևը իրա դոշերը կըվառե:

Սիմոնիս պզդիկ աղջիկ, հըլը էն ամենավիրի ժեռին աշե, սարը թիգունքով կըպահե, գիդես թե ձեռներն եղևանց կըսխմե սարի դոշին: Ժեռերն ըղման կըսիրեն...

Իմ Արագգեղի գլխին օր թուրքի սուրը կըճոջվեր, ամեն օր գիշերները ձորերից խուլ դղրդոցի ձեն գուկար: Գեղացիք կսեյին, օր էդ խորունգ ժեռերից կըսկըծու իրանց կողորդանքը կըպոզվին ու կընգնին ձորը:

Բիլամ պոյեզն օր կանցնի ես ժեռերի արանքով, իրա ձենը կըփոխվի, կըծանդոռնա ու ինչքի օր շվիգը հավար կանչե: Օղորմածիգ Գիրքորն ընծի կսեր, օր ըմբես երգեր կան ժեռ չունին, դարուփոս էլ չունին:

Կզարմանամ՝ մարդն ինչը՞խ կրնա արբի առանց իրա ժեռերի պաղմության, հըլը ո՞ւմ հեղ բղի խորատա էն ճամպա երտուց:

Ինչ հոգի բղի եղնի էն մարդու մեջը, օր միմազ տապազ ճամպեքով կըքելե ու չիդե թե ինչ է քեփլդալը, չիդե թե ինչքի սգու կուդա ջանիդ մեջը, եփ օր քիթ ու բերնով կըտապկըվիս չոր քարերին, հեղո ուժ ու կուլ կենես, ձեռներով կըսխմես չոքերդ, օր ողի կայնիս:

Էդ անհավաղ մարդիկ կսեն, թե ժեռերը խոսալ չիդեն: Հըլը դու գիշերն արի ու կայնի ըղեղ, կըզարհուրիս իրանց աղիողորմ ձեցից: Մեզ գուկան, մեզ կըխընդան, քամու հեղ կռիվ կենեն, երեսների փոթերը վախտ կա կըպլբա, վախտ էլ կա՝ խավարի մեջը գիդես թե կըղողա:

Բալա՛ ջան, դու ընծի ըսա տեսնիմ, զարման գլխին օր գելնիս սարը, մանուշագներն ուրդի՞ց կըքաղես:

- Աղե՛ ջան, հենց ես ժայռերի ծերպերի մեջ եմ նրանք աճում ու կարծես թե թաքնված լինեն: Մանուշակի փնջերը այստեղ ենք կապում:

- Սիմոնիս պզդիկ աղջիկ, կըտեսնի՞ս, օր սարի բաց դոշերին մանուշազ չկա, իրանց տեղը ժեռերի գլխին է, ըղուր հըմար էլ իրանք պահապան կեղնին սարերին: Ես հավիդենից կայնած ժեռերը իրանց սերը մանուշագի աչքերով մեզի կըղոգեն: Ես միշտ կըմդածեմ, թե էդ բարազ ցողունը ինչքի կըճոջե էդ ծանդա հողը ու ինչքի էդ ժեռ քարերի տազը պղղեղով կըզոնի իրա ճիշտ ճամպեն, աբրելու ճամպեն:

Էդ մանուշազն իրա ճակատագիրն ունի: Մենք էլ ծաղգի պես, բալա՛ ջան, կերտանք ու կերտանք, ծանդա բեռը մեջքերիս ու չենք մուլրի ու էլի կըշողանք: Ամեն տարի նորից կըծաղգինք, նորից բուն կըղնենք, ցողունի պես կըծգվինք, մեր բալեթին մանուշագի թերթիզների պես անուշ կըզրգենք ու էս ժեռերի պես կայնած կըմնանք: Բայց մե օրըմ, եփ օր էլ սերմ չենք տա, եփ օր էլ չենք զարդարե մեր շուրջ-բուրդը՝ կիռենմանք, օր հողը շաղընա մեզնով:

Դե քելե, բալա՛ ջան, օրը կիսվավ: Էրտանք, տեղ հասնինք:

Աղես պինդ բռնեց ձեռքս և անխոս շարունակեցինք մեր դարուփոս ճամփան՝ դեպի Անի կայարան:

Ինձ թվաց՝ սարերը ճանապարհում էին մեզ նախապետների նման և սպասում, որ մի օր աղենի հետ նորից պիտի գանք իրենց այցելության:

Ուիլյամ Սարոյան

ՎԵՐՋԻՆ ԲԱՌԸ ՍԵՐ ԷՐ

Շատ ժամանակ առաջ, երբ ես տասնմեկ տարեկան էի, մայրս ու հայրս երկար ու ծիգ վեճ ունեցան:

Վեճը ծայր առավ այն պահին, երբ հայրս տուն դարձավ Գրեֆի խանութի իր աշխատանքից, ուր բոլորի համար նա քառասունյոթ տարեկան վաճառող էր ընդամենը: Գրեֆի մոտ ամեն ինչ էր վաճառվում՝ մթերքից մինչև պատրաստի հագուստ, կենդանիներ բռնելու թակարդներ ու գյուղատնտեսական գործիքներ: Հայրս այդ գործին էր անցել օրը երեք դոլար վճարով, որ ստանում էր մետաղադրամով՝ յուրաքանչյուր տասներկու ժամյա օրվա ավարտին: Նա կարևորություն չէր տալիս աշխատանքի բնույթին, թեև իր մասնագիտությունն ուսուցանելն էր, և պետքն էլ չէր, որ աշխատանքը կարող է կորցնել ցանկացած պահի՝ աննկատ:

Արդեն վեց ամիս՝ ուշ աշնանից մինչև վաղ գարուն, նա այդ աշխատանքի մեջ էր, երբ մորս հետ վեճը սկսեց ազդել եղբորս նյարդերի վրա: Ես այդ վեճը նույնիսկ չէի նկատում, մինչև Ռալֆն ուշադրությունն չբևեռեց դրա վրա: Ես այնքան էի հիանում եղբորս վրա, որ մորիցս ու հորիցս զանգատվելու հարցում միացա նրան:

Սակայն ավելի լավ է նախ նկարագրեն վեճը, եթե դա հնարավոր է:

Ընտանիքում նախևառաջ մայրս կար, որ կառավարում էր տունը, և հայրս, որ Գրեֆի մոտ էր աշխատում: Հետո գալիս էր եղբայրս՝ Ռալֆը, որն ավագ դպրոցի վերջին դասարանում էր: Հետո ես կայի՝ տարական դպրոցի գրեթե վերջին դասարանում: Եվ հետո մեր քույրը՝ ինը տարեկան Ռոուզը, որ վայելում էր կյանքը ուղղակի՝ առանց դուլզե-ինչ հոգս ունենալու:

Ամենը, ինչ կարող եմ ասել մորս մասին, այն է, որ նա պարզապես կին էր, ինձ համար՝ շատ գեղեցիկ կին: Շատ արագ փոխվելու մի բնավորություն ուներ՝ երգելու-ծիծաղելու բերկրանքից մինչև լուռ ու մռայլ անբավականությունը, որ մտահոգում էր հորս: Հիշում եմ՝ լսում էի, թե ինչպես էր նա կրկին ու կրկին ասում մորս. «Էհ, ի՞նչ է եղել»:

Ավա՛ղ, հարցը միշտ անօգուտ էր լինում՝ մորս ստիպելով լաց լինել, իսկ հորս՝ հեռանալ տնից:

Երկար այդ վեճի ընթացքում հայրս անհույս շվարճած ու խորամանկությամբ գերազանցված էր թվում ինչ-որ անսպասելի ու անախտոժ բանից, որը, սակայն, նա ի գործու էր կարգավորել և իրենից հեռու վանել:

Իմ եղբայր Ռալֆը դպրոցն ավարտեց և այդ ամառ ժամանակավոր գործ գտավ խաղողի մի այգում: Ամեն առավոտ՝ լույսը բացվելուն պես, հեծանվով տասնմեկ մղոն ճամփա էր կտրում այդ այգին հասնելու համար և ետ դառնում երեկոյան մութն ընկնելուց առաջ: Գործավարձը ժամը քսանհինգ ցենտ էր, և եղբայրս այդ գործն անում էր օրվա ընթացքում առնվազն տասը ժամ: Սեպտեմբերի սկզբին արդեն հարյուր դոլարից ավելի ետ էր գցել:

Մի վաղ առավոտ նա ինձ արթնացրեց: -Ուզում եմ մնաս բարով ասել, - ասաց նա: - Սա՛ն Ֆրանցիսկո եմ գնում:

-Ինչի՞:

-Եստեղ մնալ էլ չեմ կարող: Թե աչքերում լճացած արցունքները չլինեին, կարծում եմ, կասեի. «Դե, քեզ հաջողություն, Ռալֆ», սակայն արցունքներն անհնար դարձրին այդ: Եղբայրս խո-

շորակազմ էր, ինչպես հայրս: Հագի կոստյումը հայրիկինն էր, որ մայրս էր ձևափոխել-հարմարեցրել վրան: Բայց ինչի՞ համար էին արցունքները: Արդյո՞ք դրանք մեկ րոպե անց հայտնվելու էին նաև իմ աչքերում՝ բոլոր այդ տարիներին երբեք չարտասվելու հարցում եղբորս ընդօրինակելուց հետո, նաև ինձ մոտ նրա արտասվելուց հետո, եթե հաշվի չառնենք այն երկու-երեք անգամները, որ ազատություն էի տվել արցունքներին, երբ մեռակ եմ եղել, ու ոչ մեկն այդ մասին չի էլ իմացել: Ու եթե իմ աչքերում ևս արցունքներ հայտնվեին, հաճում ինչի՞ կլինեին դրանք:

Այն ամենը, ինչ գիտեի, եղբորիցս էի սովորել, ոչ թե դպրոցից, իսկ ինչ որ նա գիտեր՝ հորիցս էր սովորել:

Այսպես, ուրեմն, ի՞նչ գիտեինք մենք: Հայրս ի՞նչ գիտեր: Եղբայրս՝ ի՞նչ: Ե՞ս ինչ գիտեի:

Ես վեր կացա անկողնուցս, արագ վրաս քաշեցի շորերս ու դուրս ելա ետնաբակ: Ծեր չինարու տակ կանգնած էր գրեթե ավարտված լաստանավը, որ եղբայրս ու ես պատրաստում էինք ազատ ժամերին, որպեսզի օրերից մի օր Քինգզ Ռիվերում գործի դնեինք: «Ես մեռակ կվերջացնեմ, - մտածեցի ես, - հոսանքով մեռակ կիջնեմ Քինգզ Ռիվերով»:

Եղբայրս հանդարտ դուրս ելավ տնից՝ ձեռքին մի հին ծղոտե ճամպրուկ:

-Ես լաստանավը կվերջացնեմ, - ասացի ես:

Կարծում էի՝ եղբայրս ինչ-որ բան կասի՝ ծայրի նույն անհաստատ տոնով, հետո կշրջվի ու կհեռանա, ու հենց այդպես էլ կլինի:

Փոխարենը, սակայն, նա ցած դրեց ճամպրուկն ու մոտեցավ լաստանավին: Մտավ մեջը և նստեց, ասես հենց նոր էինք լաստանավը ջուրն իջեցրել ու նստում էինք Քինգզ Ռիվերի վրա: Եղբայրս ձեռքը գցեց լաստակողին, ասես՝ Քինգզ Ռիվերի պաղ ջրերի մեջ, և նայեց շուրջ՝ կարծես լաստանավն անցնելիս լինե՞ր խաղողի այգիների ու մրգաստանների միջով: Քիչ անց նա ոտքի ելավ ու ճամպրուկը բարձրացրեց գետնից: Աչքերում այլևս արցունքներ չկային, բայց նա չէր կարող ուղղակի ասել՝ մնաս բարով: Մի պահ կարծեցի, թե մտադիր է հրաժարվել հեռանալու մտքից ու կրկին անկողին մտնել:


Փոխարենը նա ասաց. -Երբեք եղ տունը չեմ դառնա: -Դու ատու՞մ ես նրանց: Է՞դ է պատճառը:

-Չէ, - ասաց նա և սկսեց լաց լինել, ասես ինը-տասը տարեկան լինե՞ր, ոչ թե գրեթե տասնյոթ:

Ես բարձրացրի լաստանավը, շուռ տվեցի այն և սկսեցի ցատկոտել մեջը, մինչև որ տախտակներից մի քանիսը, որ այնքան խնամքով իրար էինք գամել, կոտրվեցին: Այնուհետև սկսեցի վազել: Չշրջվեցի, որ կրկին եղբորս չնայեմ: Վազքով ու քայլքով անցա ողջ ճամփան՝ գրեթե վեց մղոն, մինչև այն տեղը, ուր ծրագրել էինք լաստանավը գործի դնել: Նստեցի գետի ափին ու փորձեցի մտքերս ի մի բերել:

Սակայն՝ ոչ մի օգուտ: Ես այդ ամենն ուղղակի չէի հասկանում, այդքան բան:

Երբ տուն հասա, առավոտյան տասնմեկն անց էր: Շատ էի քաղցած, ուզում էի մի բան ուտել: Հայրս Գրեֆի խանութում



իր գործին էր: Քույրս տանը չէր, իսկ մայրս չէր թվում, թե ուզում է նայել վրաս: Նա ուտելիք դրեց սեղանին՝ սովորականից շատ, ուստի ես լրիվ համոզվեցի, որ ինչ-որ բան գիտի կամ թե, համեմայն դեպք, կասկածում է:

Ի վերջո ասաց. -Լաստանավը ո՞վ է կոտրել: -Ես: -Ինչի՞: -Բարկացել էի եղբորս վրա: -Ինչի՞: -Ուղղակի բարկացել էի: -Հաջո՞վ կե՛ր: Նա հյուրասենյակ մտավ, իսկ ես սկսեցի ուտել:

Երբ հյուրասենյակ մտա, մայրս, նստած կարի մեքենայի առջև, փոքրացնում էր հորս կոստյումներից մեկը: -Ես մեկը քեզ համար է, - ասաց նա: -Ե՞րբ կարող եմ հագնել: -Մյուս կիրակի: Սա հորդ հմերից է, երբ որ ավելի միայն էր: Լավ կնստի վրադ: Դուրըդ գալիս է՞:

-Հա: Նա ձեռքի շորը մի կողմ դրեց, փորձեց ժպտալ, հետո ժպտաց մի թեթև: «Չգիտի՞ ինչ է եղել», - մտածեցի ես: Հետո մտածեցի, թե կարող է գիտի, ու հենց եղպիսին է իմը:

-Եղբորդ հեծանիվը գարածում է, - ասաց նա: - Նա որտե՞ղ է: -Սա՛ն Ֆրանցիսկոյի ճամփին: -Բա դու ո՞ւր էիր: -Ձբոսնելու էի գնացել: -Ձբոսանքդ երկա՞ր էր: -Հա: -Էդ ինչի՞: -Ուզում էի մեռակ մնալ: Մայրս մի պահ հապաղեց, այնուհետև ասաց.

-Եղբայրդ ինչի՞ է Սա՛ն Ֆրանցիսկոյի ճամփին: -Դե, որովհետև...: - Բայց ուղղակի դա նրան ասել չէի կարող: -Հա, դե լավ, - ասաց նա: - Ասա՛: -Որովհետև դու ու պապան էդքան շատ եք կռվում: -Կռվո՞ւմ: -Հա: -Իրո՞ք, - ասաց մայրս: -Ես ի՞նչ գիտեմ: Նրան ստիպելու եք, որ տո՞ւն գա: Պապան գնալու է բերի՞: -Չէ՛: -Պապան գիտի՞: -Հա՛, ինքն ինձ ասաց: -Ե՞րբ: -Հենց քո փախչելուց հետո, երբ եղբայրդ էլ գնաց կայարանի կողմը: Հայրդ տեսել է

եղ բոլորը:

-Բա չի՞ ուզել նրան կանգնեցնել: -Չէ՛: Դե, հիմի դուրս արի ու սարքիր լաստանավը:

Ես լաստանավի վրա չարչարվում էի ամեն օր և վերջացրի երկու շաբաթում: Մի երեկո հայրս օգնեց ինձ բարձրացնել այն իր վարձած բեռնասայլակի վրա: Մենք շարժվեցինք դեպի Քինգզ Ռիվեր, լաստանավը ջուրն իջեցրինք ու թիավարեցինք գետն ի վար՝ մոտ տասներկու մղոն: Հետո հայրս գրպանից հանեց մի նամակ ու բարձրաձայն կարդաց: Նամակը հասցեագրված էր Սիրելի Մայրիկին ու Հայրիկին: Նամակում Ռալֆը գրում էր, թե գործ է գտել, որն իրեն դուր է գալիս, պատրաստվում է քուլեջ մտնել, երբ աշնանը ուսումնական տարին սկսվի, և որ լավ է ու երջանիկ: Նամակի վերջին բառը «սեր» էր:

Հայրս նամակն ինձ տվեց, և ես այդ բառը կարդացի մտքիս մեջ:

Սուրբ Ծնունդին հայրս ինձ ուղարկեց Սան Ֆրանցիսկո՝ եղբորս հետ մի քանի օր անցկացնելու: Ինձ համար հոյակապ մի արկած էր դա, որովհետև եղբայրս այժմ արդեն այնքան ուրիշ էր՝ գրեթե հորս նման, բացառությամբ այն բանի, որ ապրում էր կահավորված վարձու մի սենյակում, ոչ թե մարդկանցով լեցուն մի տան մեջ: Նա ցանկացավ իմանալ լաստանավի մասին, և ես ասացի, թե նավարկել եմ դրանով ու մի կողմ դրել՝ ձմռան պատճառով:

-Եկող ամառ արի, ու իրար հետ կնավարկենք՝ ո՞նց պայմանավորվել էինք, - ասացի ես:

-Չէ, - ասաց նա: - Մենք իրար հետ արդեն նավարկել ենք: Եղ լրիվ քոնն է հիմի:

Իմ որդին հիմա տասնվեց տարեկան է և վերջերս հասկացրեց, թե մայրն ու ես ժամանակ առ ժամանակ վիճում ենք: Ո՛չ մի նոր բան, անշուշտ. նույն ընդհանուր վեճը, սակայն ո՛չ նրա մայրը, ո՛չ ես առաջներում երբևէ չէինք նկատել, որ դա նրան բարկացնում է: Բայց գիտեմ՝ ավելի ուշ - այս կամ թերևս հաջորդ տարի - նա մտադիր է խոսել կրտսեր եղբոր հետ, այնուհետ տնից հեռանալ: Երբ դա պատահի, ուզում եմ պատրաստ լինել՝ այնպես որ կարողանամ զսպել մորը տղային ետ պահելու փորձից: Նա լավ տղա է, ու ես չեմ մեղադրում, որ կարծում է, թե կյանքս չփոթեմ դարձրել՝ մի բան, որ ինքը չի՝ պատրաստվում անել:

Անշուշտ, չի՞ պատրաստվում:

Բնագրից թարգմանեց
Նիմա Ա. ԶԱՂԻՆՅԱՆԸ
Բան. գիտ. թեկն., դրոցնտ



...ՈՐՈՎԷՏԵՏԿ ԿՐԻ ԵՄ

Ժողովածուից

«Ամեն ինչ կատարյալ էր, // Մինչև մարդու հայտնվելը Երկիր մոլորակի վրա, // իսկ բացարձակ կատարելության համար // Աստված ստեղծեց կնոջը, // որ շարունակի սուրբ գործը Երկրի վրա // ու մարդ ստեղծի...»:

/Նարինե Ապոյան, «...որովհետև կին են», Եր., 2025 թ./

Կնոջական... ամեն ինչ անցնում է կանացի՝ Նե-ի սկզբի առանցքով՝ սերը, երջանկությունը, լուսությունն ու տառապանքը, և, հիրավի, խորհրդանշական է խորագիրը ժողովածուի, խոսում և համապարփակ:

Ասել, թե հեղինակի բոլոր տողերը շնչում են սիրով և երջանկությամբ, հարկավ սխալ կլինի. հապա ցա՞վը, երբ, իր իսկ խոսքով, «հոգիդ պոկում են մարմնիցդ», հապա վերքե՞րը, որոնց վիրակապելու համար ոչ մի հիվանդանոց չկա. «...ի վերջո քեզ համար տեղ թող, // որտեղ խնամքով կպահես երագներդ // ու տիեզերքդ», -ասում է հեղինակը:

«...ես՝ մեղավորս, // թեկուզ միայն նրա համար, // որ եվան է կերել խնձորը», -անգամ մեղսոտ կանացի սկիզբը գիտակցելով՝ գալիս է նա՝ սեփական ծնունդից, մանկության՝ իր իսկ բառերով, մահճի տակ, հետո իր ներսում հայտնված «ղեերի ուղեկցությամբ» երջանկության փնտրտուքով, անշուշտ, ինչպես ամեն մեկն այս աշխարհում: Եվ ինքն իր հետ երկխոսության համար որպես հենք մո՞ր հետ երկխոսությունն է ընտրել՝ բնականաբար՝ պորտալարի հիշողությամբ՝ կրկին սեփական սկզբի խորհրդանշիչ որպես. «Սանրիի վարսերս ու հյուսերիս մեջ երագներ դիր // ու ծի՛գ կապիր հավատով, // ինչպես դպրոցական տարիներին էիր անում», -ասում է գրողը:

Բացվում են խոհերի շերտերը՝ անձնական հուզապրումներ՝ ճյուղերով. կոչականը մայրն է, նախ՝ ինքնաորոնման, ապա և՛ երջանկության փնտրտուքների խաչներով, կոչականը սերն է՝ սպասված ու անսպասելի, կարոտի ու ցավի արանքում, հեռացումի ու բաժանման, ունայնի ու տառապանքի արանքում, և կոչականն Աստված է. չէ՞ որ ամեն սկզբի ՍԿԻԶԲՆ է ՆԱ:

Ապա հայրենիք՝ պատերազմի ժամանակ և ընդհանրապես: Ի դեպ, այս տողերը արժանի են հանգամանակից քննության: «Պատերազմ ապրած մարդու հետ զգո՛ւյշ վարվեք. // դուք չգիտեք՝ նրա ո՞ր բաց վերքին եք կաշում: // Ի՞նչ իմանաք՝ քանի՜ անհետ կորած կա նրա ներսում,

// քանի՜ գերեզման կա, ու քանիսը գերեզման չունեն, // քանիսն են լքել նրան, երբ հայրենիք էր փրկում, // քանիսի՞ն է լքել...»:

Պարզ է՝ նա մարդն է, ում ներսում դեռ չի էլ ավարտվել պատերազմը, և դեռ ինքն իրեն չի էլ դուրս բերել կրակներից: Կամ՝ «Ամեն պայթյունից իմ մեջ մեկը մեռնում էր. // Աստված առաջինն է», -նկատի ունի հավատի՝ ակնթարթորեն թուլանալը, ինչը մարդկային է, հատկապես այդ պրկված նյարդերով հասուն օրերի համար:

«...Գիշերվա ու քնի մեջտեղում նրա մասին երագներն էին, // որ արթնանալուց հետո ջրին չէր պատմում», -միտք, որ, անշուշտ ապրված է. չէ՞ որ որպես հետևանք «ներսում մի տեղ, միշտ ցավում էր»: Ապա զգայուն այս հույզին հետևում է, այսպես ասած, արդարացված միավորումը. տղամարդուց ապրել սովորելուց հետո նաև նրա մեջ ծաղկելու, նորոգվելու, հասունանալու-պտղակալելու՝ տրամաբանորեն իրար հաջորդող ժամանակներն են գալիս: Եվ հավատը, իհարկե, որպես արձագանք կանչի, սիրո և սպասումի կանչի, թե. «Արի՛ ու ծնվի՛ր իմ մեջ... // Արի՛, ինչպես երբեք, // ինչպես որ չես գ/ն/ալու...»:

Փրկություն ինքն իրենից, իր ճակատագրից գուցե, բայց նախ՝ ինքնաճանաչման գտնված հնարքով. «...Օգնիր հասկանալ, // որ ես արդեն չափազանց մեծ եմ // հեքիաթներին ու մարդկանց հավատալու համար... // Որ ամեն ինչի սկիզբն է միայն տարբեր. // վերջն է նույնը, մահ, վերջը... // ու վերջ»:

Ժողովածուում բանաստեղծությունների հերթագայությունը՝ ամբողջության մեջ, պոեմի արժեք է ստանում:

Գրքում արձակ բանաստեղծություններ են նաև՝ ուրույն վերջաբաններով. «Քեզ հետ ես սովորեցի թո աչքերով մայել կյանքին ու սիրել ինձ...», կամ «Եթե վախենում ես, որ քեզ կմոռանան, սեր եղիր, թող մոռանան քեզ» և այլն:

Ապա նաև նրբին հուճորի շղարշով մտորումներ են՝ ծնված ապրված իրականությունից՝ բնորոշ ճշմարտությանը, կյանքի՝ ճշմարտությանը: Այդպես՝ լքումը, կնոջական՝ դանդաղ, տարիների ընթացքում, լուռ... ինքն իրեն լքելը, որովհետև «Այսքան հոգատար // և այսպես խնամքով ոչ ոքի չի լքում կինը, // բացի իրենից...»: Ահա տառապանքի տողը. «Դու կարող ես ամբողջ գիշեր կծկվել էմբրիոնի նման // ու լուսաբացին այդպես էլ չծնվել, // որովհետև գիշերը վիժել է քեզ, // դու՛ սպասելիքներդ...», և կարոտից ծնված տողը. «Ուզում եմ զանգել ու ասել // դու հավաքել ես աշխարհի բոլոր կարոտներն // ու թաղել իմ մեջ... // Զգո՛ւյշ. // կարոտներս դեռ ողջ են...»:

Յեղիականի ձեռագրի ինքնատիպ դրսևորումներից մեկը կարելի է ներկայացնել ամբողջությամբ՝ տպավորությունը լիարժեք դարձնելու համար. «Իմ ներսի կանայք անհանգիստ են. // տեղդ չեն գտնում... // Երեկ աշտարակներ էին սարքում, // որ քեզ հասնեին: // Զգիտեմ՝ ո՞վ խառնեց նրանց լեզուն // ու երբ. // այսօր իրար չեն հասկանում... // Ներսումս աղետ է. // իմ ներսի կանայք կորցրել են իրար... // Մեկը հիմա տապանաբար է սարքում...»:

Եվ անշուշտ մեծ, անպարագիծ սիրո խոստովանություն՝ առ այդ, թեկուզ անփոխադարձ, թեկուզ կորցրած կամ դրա ստույգ վտանգի առջև:

Այսպես, անձնական ու անանձնական, իր կյանքի և կյանքի մասին ընդհանրապես, իր՝ ապրված զգացմունքի մասին և սիրո մասին ընդհանրապես. տողեր են, որոնք հեղինակի երախայրիքը լինելով՝ համարձակ են, առանց փակագծերի և ծեծծեքումների, անգամ՝ մյուս եզրը՝ առանց դրանցում թաքնվելու միտումի:

...«Երեկ որոշել եմ, // որ վաղվանից հեքիաթ եմ պատմելու // երազանքներիս, որ քնեն. // ինձ ոչ ոք հեքիաթներ չի պատմել... // Ասում են՝ հրաշքներ պատահում են, // Սպասիր...»:

Կարինե ՄԱՐՏԻՐՈՍՅԱՆ
Բան. գիտ. թեկնածու, դոցենտ

Քաղաքը, ուր վաղուց ոչ ոք չի ապրում, քո մասին հեքիաթ է պատմում մայթերին, որտեղ քեզնից հետո անձրևները չեն դադարում, իսկ խաղաղության մասին մոռացած աղավաղներից ագռավներն են բերում.

Այս քաղաքում ձիթենիներ չեն աճում... Ու ճանապարհները, որոնք մոռացել են ոտնահետքերդ, վաղուց չեն հատվում իրար ոչ մի խաչներով...

Այս համատարած դատարկության մեջ միայն լուսությունն է արձագանքում ու դիպչում շենքերի բետոնե պատերին, արտասուք դարձած՝ գլորվում է աշխարհի աչքերից ու հեղեղ դառնում դեպի քաղաքի սիրտը, ուր բոլորը լքել են իրար. ուր բոլորը պարտաճանաչ լքում են իրար այսօր. վաղը ուշ կլինի...

Քաղաքը, որ էլ չկա, սպասում է քեզ նույն համառությամբ, ինչով որ պատերազմ սկսեց խաղաղության դեմ ու տանուլ տվեց քեզ ժամանակին... Այստեղ ամենուր սպանված դիակներ են, քայլող արկեր ու նորածիններ, որ մեռած են ծնվել...

Այս քաղաքում գիշերը ոռնում է լիալուսնին, ու էլի մեկը, ով միշտ սպասում է քեզ...

Մենք այդպես էլ մարդավարի չխոսեցինք իրար հետ ու ոչ էլ կարգին հրաժեշտ տվեցինք իրար:

Դու չմնացիր ինձ հետ վերջին գիշերը ու սովորաբար չգնացիր լուսաբացին, երբ ես հագիվ քնել էի, թեև ես այդպես էլ քնել չկարողացա...

Դու չգրկեցիր ինձ ու մի տաք ծածկոց չգցեցիր վրաս, ու ես այդպես էլ չփվեցի քո ներսում, բայց ներսումս ավերակ մնացի...

Դու չհամոզեցիր ինձ տաք թեյ խմել, ու սառած մատներս չտաքացան բաժակից, ու դու այդպես էլ չիմացար՝ թեյը երբեք այսքան աղի չէր եղել...

Դու այդպես էլ չշոյեցիր գլուխս, որը երբեք չհենցի քո ուսին ու չմխիթարվեցի ո՛չ քեզնով, ո՛չ Աստծով ու քո ծնկներին մանկան նման չխաղաղվեցի, ու այդպես էլ մայր չմտա քո հոգում...

Դու այդպես էլ չսովորեցիր ճիշտ հեռանալ, ես էլ չսովորեցի բաց թողնել... Ու թողեցինք ամեն ինչ ճակատագրին, որն այդպես էլ որոշված չէր մեզ համար...

Մենք չկարողացանք ճիշտ խոսքեր գտնել, ոչ էլ սխալ խոսեցինք, չլռեցինք նույնիսկ իրար գլուխ ավերի մեջ առած, բայց լռեցինք կարևորի մասին... Ո՛չ արտասվել կարողացանք, ոչ էլ արցունքները խնամքով թաքցնել, բայց թաքցրինք մեզ ու խեղդվեցինք իրար մեջ, օգնեցինք իրար օտարանալու, բայց այդպես էլ օտար չդարձանք. դու փակվեցիր իմ մեջ ինչպես ամոթ, ես մնացի քեզ հետ անամոթի պես...

Մենք այդպես էլ իրար ճիշտ չհասկացանք, բայց հասկացանք՝ ամեն ինչ նման էր սիրո. ամեն ինչ սխալ էր սկզբից: Վերջում թողեցինք իրար ճիշտ ժամանակին անժամանակ ու առանց տեղ որոշելու. -Լավ մնա: -Դու՛ էլ... ...չմնացինք...

Ու այդպես էլ կարգին հրաժեշտ չտվեցինք իրար, ոչ էլ մեզ մարդավարի պահեցինք...

Ի՞նչ կարևոր է՝ վաղն ո՞վ կփրկի աշխարհը կործանումից, որովհետև դու ինձ աշխարհներ խոսք չես տվել: Դու ինձ ոչինչ խոսք չես տվել, բայց խոստացել ես լքել ու մոռանալ ինձ վաղը, երբ ես կսիրեմ քեզ այնպես, ինչպես դու՝ հայրենիքը, ու կմնաս իմ մեջ անավարտ, ինչպես բոլոր պատերազմները, որ հաշտության պայմանագիր են կնքում ու թանկ են վճարում խաղաղության համար...

Ի՞նչ կարևոր է՝ վաղն ո՞վ կլինի աշխարհի տերը, որովհետև դու տեր չես ինձ այնպես, ինչպես ես հնազանդ չեմ այս կյանքին, ուր բոլորը նախընտրում են անկեղծությունը, դու շարունակի՛ր խաբել ինձ. ես ուզում եմ երագել...

Ի՞նչ կարևոր է՝ վաղը ո՞վ կկործանի աշխարհը, որովհետև դու չես փրկել իմ աշխարհը կործանումից...

Եվ ի՞նչ կարևոր է՝ որ վաղը կկորցնեմ քեզ, որովհետև քեզ երբեք էլ չեմ գտել...

ԵՂԵԳԱՆ ՓՈՊ

Նրանք, ովքեր ուզում էին ինձ ողջ-ողջ թաղել, սովորեցրին ինձ լողալ հողի մեջ ու ծուկ բռնել հողից... Ովքեր փորձեցին խեղդել ինձ ջրերում, սովորեցրին ինձ լողալ դեպի բաց ծով ու մարգարիտներ հավաքել հատակից... Իսկ ովքեր հրեցին ինձ թիկունքից, սովորեցրին թռչել երկնքից բարձր ու դեմքով ճանաչել Աստծուն...

Սա էլ կանցնի, որովհետև ամեն ինչ մի օր անցնում է... Ովքեր ինձ քաղում էին, չգիտեին, որ կյանքը ծաղկելու մասին է հենց այնտեղ, որտեղ հույսը վերջինն է մեռնում...

Իմ ու քո սիրո միջև չլվացված ամաններ կան, չարդուկված վերնաշապիկ ու չփռած լվացք կա...

Իմ ու քո սիրո միջև չհավաքած անկողին կա, հատակին թողած հագուստի կույտեր, չհերիքող լվացքի փոշի կա...

Իմ ու քո սիրո միջև դեռ չմաքրած լոգարան կա, հատակին թափված ջուր, սանրի վրա թողած մազափնջեր կան...

Իմ ու քո սիրո միջև չլվացված դռներ ու պատուհաններ կան, սառն-ծմեռ չարված դարակներ, չսրբած փոշի կա...

Իմ ու քո սիրո միջև չհավաքված կոշիկներ կան՝ չլվացված ու ցեխոտ, չգոռած հողաթափեր ու զույգը կորած կամ ծակ գուլպաներ կան:

Իմ ու քո սիրո միջև ծնողական ժողովներ կան, չվերջացող բողոքներ ու չավարտված դասեր կան...

Իմ ու քո սիրո միջև չեփված ճաշեր կան, հատակին թափված հացի փշուրներ, դեռ սովածներ ու ամեն ինչից կշտացածներ կան...

Իմ ու քո սիրո միջև անժամանակ կեած գարուն կա, չափված տերևներ, չէտած ծառեր կան...

Իմ ու քո սիրո միջև խելառ սիրո պատրաստ դուստր ու որդի կա, վեճեր, կամակորություն ու անիմաստ գոռոցներ կան...

Իմ ու քո սիրո միջև չհերիքող փող կա, չվճարված կոմունալներ, վարձեր ու չգնված ապրանքներ կան...

Իմ ու քո սիրո միջև մշտական դադարներ կան, չքնած գիշերներ, չկիսած կեցցաղ, օտար քաղաքներ ու ինքնաթիռներ կան...

Ամեն ինչ կա իմ ու քո սիրո միջև, բացի իրարից...

ԽՈՂԵՐ ԼԻԼԻԹ ՄԿՐՏՉՅԱՆԻ

«10950 օր ժաժք» գրքին շուրջ



Կնշանակէ երկրաշարժ, գրքին վերնագիրը արդէն իսկ առաջին հայեացքէն կը ստիպէ, որ պահ մը ոտքի ելլես ինքզինքդ առջև ու անվախ նայիս պատմութեան դէմքին: Նայիս ինքզինքդ հոն գտնելու, տեսնելու և զգալու հրամայականով, քանզի այս գրքով Լիլիթ Մկրտչեան կը ներկայացնէ ամբողջ ժամանակաշրջան մը, ուր մենք բարեցամբ մեր սեփական ցավը ծանելով, ապրեցանք անյաղթահարելի կորուստները յաղթահարելով, և մնացինք՝ ապրեցնող հայու տեսակ ու այսօր ալ կը շարունակենք պահել ինքնութեան հզօր այդ ջիղը, որու բաղադրութիւնը բարութիւնն է, հավատն ու սէրը, լավատեսութիւնն ու հայրենիքի ունեցած մեր դարաւոր հաւատարմութիւնը:

Առաջին իսկ տողերէն ընթերցողին առջեւ բացւող նկարագրութիւնները, յուրատեսակ պատմութիւնները համեմատ են Գիւմրուայ համով-հոտով բարբառով, գիւմրեցիքին յատուկ հումոր կայ այստեղ, գիւմրեցիքին յատուկ լեզվամտածողութիւն, բացառիկ պատկերներ ու նաեւ սատիրայի՝ երգիծաբանութեան ժանրով համեմատ ճշմարտութիւններ, որով յեղինակը կը մատնանշէ աննկարագրելի, անպատմելի՝ դժողքի ճիրաններէն անցած մարդու ցաւերը:

Գրքի պատկերներն ու կերպարները ապրող էակներ են, որ յիշողութեան սեփական դարպասէն կը նային մեզի՝ հասկանալու համար՝ ո՛ր հասած ենք մենք ժաժքէն 30 տարի ետք:

Պետք է նշել, որ գրքին մէջ կը գտնենք բացատրական բառարան մը, որ կը դիւրացնէ բարբառային շարադրանքը:

Եւ այսպէս ուրեմն, կրցա՞ծ ենք արդեօք մենք վերակառուցել մեր օճախներն ու հոգիները, 30 երկաթ, իսկ պատմութեան համար ակնթարթ թվացող տարիները: Ամո՞ւր ենք արդեօք կառուցել ժամանակակից, համաշխարհայնացման ակտերը դիմագրաւելու համար եւ ո՞վ է վերջապէս հայ մարդը այս ամէնքին մէջ ու այս բոլորէն դուրս, երբ իր սեփական պատմութեան էջերը թերթելով, շինարարի կամքով եւ մտաւորականի տեսլականով կը շարունակէ պահել ու պահպանել մարդկային ու ազգային ինքնութիւնն ու արժեքները:

«10950 օր ժաժք» գրքին մէջ տեղ գտած պատմութեաններուն վերնագրերը չափազանց խորիմաստ են, միմեանց հետ շարունակական, ըսելիքի ներքին ռիթմով բարբախող ու կարմիր թելի պէս իրարու հետ կապած, մէկը միւսի մէջ շարունակող, մէկը միւսով ամբողջացող:

Այլիս առջեւ է 1988-ի դէմքը, յուշերուս մէջ կապրին ընկերներս, որոնք չկան, ափերուս մէջ է անբարբառ ու կիսատ մնացած

մանկութիւնը իրենց...

Յույզերու ինքնատիպ խառնաբառն է այս գիրքը՝ ուրախութեան ու ցաւի համաճուրակ, կեանքի ու մահուան շեփորաբեր, իրական, տեսիլքային ու ինչպէս Լիլիթ կսէ՝ «Էդ օրերն աշխարհքի կալենդարից (այսինքն՝ օրացույցէն) պոկուած թերթեր չէին, մեր ապրած տարիներն էին, օր իրանց մէջ մաշին մեզի ու ապրելու հըմար բան չմնաց տակը»:

Պատումները իւրաքանչիւրն առանձին եթե առնենք, ունին իւրօրինակ գոյն ու զգացողութիւն, Լիլիթ կը նկարագրէ դեռատի սերունդի **«Չեկով հաց»**, այսինքն կտորնով հաց, կրամներով հաց բաժնուող, այդ չափաբաժնի հոգեվիճակն ու ապրումները ու մանկամարդ սերունդ մը ողջ, որ ստիպուած էր ապրիլ ու պայքարիլ կեանքը ունենալու համար, ստիպուած էր իր մանկութիւնը մոռանալ ու ժամանակի դառն շունչին տակ արագ մեծնալ ու հասուննալ, քանզի մէկ կողմէն կեանք չկար ապրելու համար, իսկ միւս կողմէն կեանքը չէր սպասեր, որ դուռ անուշ մանկութիւնը ապրէիր...

Սով էր, ու հացը կրամ-կրամ կը բաժնէին ու շատ հաճախ կը ստիպուէիր այդ սեւահաց, չորցած պատառին բույրը երկաթի պահել շուրթերուդ յիշողութեան մէջ...

Յուրտ էր ու հագած հագուստներդ մէկ կողմէն կը պաշտպանէին երեւելի ցուրտէն սակայն միւս կողմէն իրենց անյաղորդ «տաքութեան» մէջ կեանքդ կը մաշէին, որովհետեւ ամէն օր աչքդ լոյսին բանալով փառք կուտայիր Աստծոյ, որ շունչ կայ բերանդ ու ընկերներուդ պէս՝ մահը քեզի ալ չէ կըլլած:

Շատերը հայր չունէին, եւ Լիլիթի այս նկարագրութիւնը ցնցող է, գեղարվեստականօրէն պատկերաւոր եւ յուզիչ:

«Պատի վրայ պապա ունենալը սովորական էր, որդեկ ես միակը չէի: Ընկերներիցս շատերը ունէին ըղպէս պապաներ, նոյն թրաշի չափով, գինձորի շորերով ու ավտոմատներով: Իրանք մեզի հըմար պատի վրի պապա էին, բայց էն հայացքով օր իրանց դաստիարակութեան բացակայութիւնը չէինք զգայ»:

Ահաւասիկ խորախորհուրդ նկարագրութիւն մը, որ կու գայ հաստատելու՝ թէ պիտի կարենալ մարդու կեանքին մէջ ըլլալ, ըլլալ ո՛չ սովորական ու շատ յաճախ ալ ոչինչ ասող միայն ֆիզիկական ներկայութեամբ: Այսպէս, ամբողջ սերունդ մը դաստիարակեցաւ «Պատի պապա»-ներուն հայեացքին ներքոյ, մնալով հաւատարիմ հայրերու դաստիարակութեան, որովհետեւ՝ ամօք էր սխալ բան ընելը՝ պապան ի՞նչ կսեր, կամ տուն վերադարձել ետք, ինչպէ՞ս պիտի համարձակէիր նայիլ

պատնէ կախուած պապայիդ լուսանկարի աչքերուն...

Գրքին մէջ տեղ գտած ամէն մի պատմութեան ընթերցողին առջեւ կը բանայ զարմանալի մտապատկերներ ու յոյզեր, որոնց ըսելիքը խորքային է, նաեւ ենթահիմաստային, ու եթէ զանոնք առնենք գրաքննադատական հայեացքի տակ, կարելի պիտի ըլլայ իւրաքանչիւրը առանձին-առանձին վերլուծութեան ու գնահատանքի ենթարկել:

Օրինակ առաջին պատմութեան՝ «Ժաժքի տակ մնացած լայքեր»-ի ենթահիմաստը բնութագումը ընթերցողին մտածելու, խորհելու առիթ կուտայ:

Լիլիթ կը գրէ .«Քաղքիս երկընթէն օր թողը (այսինքն փոշին) քաշվալ, սաղս ժշշտից (թիթեղիայ) տներ ունեցանք, դպրոցներն էլ էին ժշշտէ, մանկապարտեզներն էլ, հիվանդանոցներն էլ... Մենք էլ ժշշտէ մարդիկ դառանք՝ դիմացկուն ու ժանգոտ: Մենք մեզի համոզինք, օր ըսիկ լալ է. ինչքան էլ ուժեղ ժաժք էլ-նի, չի բլի, ու շարունակինք ապրել, խնդալով ապրել ու խնդացնել»:

Ահա եւ կեանքի այս անգոյն գոյներու նկարագրութիւնը, որ իր մէջ ամբարած է հոգեբանական ամենատարբեր զգացումներ, սակայն ամոնք լաւատեսութեամբ յաղթանակած են, ու թեւ պատմութիւնը ակամայօրէն կիսված է երկու մասի, «Ժաժք»-էն առաջ ու «Ժաժք»-էն ետք, սակայն յաղթանակած է կեանքը, ու բոլորս պատրաստ ենք շարունակել ապրիլ, պատուախնդրօրէն ապրիլ նաեւ բացականերուն համար ու անոնց տեղը:

Երկրորդ պատմութեան՝ «Տեղական թոզն ու իմպրոնի փոշին»

Բոլորս վստահաբար կը յիշենք՝ այդ օրերուն աշխարհի տարբեր անկիւններէն Յայաստան հասնող օգնութիւնները: Լիլիթ կը գրէ՝

«Մերոնք կ'իմպրոնէին, աշխարհի վրից բարութիւնը չէր վերացել ու մեզի չորս թարֆից սկսին պասիկէթ դրգել: Կերթայինք 3 ժամ օճերի մէջ կեանքի ու մահուան կռիվ կուղայինք, թոզի մէջ կորած, շնչակտուր տուն գուկայինք մեր բաժնի պասիկէթով: Ուրախ կբանայինք պասիկէթն ու ընտել թոզ էր. մենակ իրանց թոզը սիրուն ուպակովկով էր»:

Ահա եւ կառնչուինք այդ օրերու ու դժուարութիւններու հանրագումարին ու այս նկարագրութիւնները սոսկ թեմատիկ կամ միջանկեալ պատումներ չեն, այլեւ ինքզինքդ լաւ ճանչելու յուրատեսակ հայելի եւ դժնդակ փորձութիւններուն մէջ կամ ետք՝ մեծատառով մարդ մնալու արվեստ եթե ողջ մնացիր, ուրեմն կը պարտաւորիս շարունակել մեռելներուն կեանքն ալ. ի՞նչ է այս մեկը, ճակատագրի հեզմանք, հիվանդ ուղեղի մարմա՞ջ, դժբախտութենէն պատուով դուրս ելլելու ձգտո՞ւմ, ամենարդկային ցաւերու բժշկո՞ւմ, թէ՞ անհատի կամ ազգային ինքնութեան շարունակական պայքար:

Մէկը միւսի մէջ շարունակող նկարագրութիւնները աչքիդ առնէն կը բանան եւ կը տարածեն անպատմելի շոշափելի դարձրած, անասելի հոգիիդ խորքը թափանցող, անտեսանելի ու անլսելի ծայները յոյզերու ռիթմով բարբախող կեանքդ, ուր կը փոխուի ժամանակը, ու անոր պատկերացումը կարծանգաւքի մարդուն մէջ, ինչպէս օրինակ՝

յաջորդ պատմութեան՝ «Վերասյա կեանք»-ին մէջ այս պատմութեանը նոյնպէս շարունակութիւնն է նախորդին, սակայն հոս գոյները կը խտանան, երբ մարդ դէմ-հադիման կը կանգնի իր սեփական վարք ու բարքի առջեւ, զայն տեսնելու կամ նոյնիսկ չտեսնել տալու արժեհամակարգին, անոր կը հաւելնայ մարդկային բարձր գիտակցութիւնը, հարազատին, ազգականին կամ ընկերոջ օգնելու ու կարեկցելու ունակութիւնը, ցաւը կիսելու հայուն ինքնատիպ կարողութիւնը:

Ընտիր է Լիլիթի «Օրշի բաղնիքի նամուսով օջիւները» (հանրային, ընդհանուր բաղնիքի պատուախնդիր օջիւները)

Գունագեղ պատում մը, համեմատած գիւմրեցուն յադուկ սուր հումորով:

Պատկերային արտակարգ լուծումներով հարուստ է այս պատմութեանը, որ կարդացած պահերուդ անհնար է, որ կերպարներն իրենց համով-հոտով գրոյցով անցնին մտապատկերիդ առջեւէն, ինչպէս բեմադրուած ներկայացում մը:

Գրքին յաջողութեանը գրաւականներէն մին այն է, որ թէւ նիւթը ինքնին ծանր է ու ցաւահին, սակայն նոյնքան կեանքոտ ու կենդանի, որ կուգես տեսլ նկարագրութիւնը անգամ մը եւս ընթերցել ու զգալ ամբողջապէս:

«Ամսվա վերջի կիրակին բաղնիքի օր էր: Ըդիկ հենց ընպէս չէր որոշուած, յադուկ հաշուարկ էր, օր դէկտեմբեր ամսվա վերջի լողնալը հաշվըվեր մաքուր հոգով նոր տարի մտնելուն:

Լսերի (լոյսերի) հովարային անջատումները հաշվի չէին առնի բաղնիք գալուդի մաքրվելու երազանքը, ու կեղներ, օր լողնալու կեսից կըմարեր լոյսը: Սաղ վախվորած փռփռուները կըլվային, մէկ էլ խավարի միջից մեկըմ սատանա տեսածի պէս կծվար (կը պոռար) ու սաղ բաղնիքի չբաղ (մերկ) կընգտիք (կանայք) կծայնակցեին իրար: Միմեկէ կհասկնային, թէ ինչ էղաւ կըմա դուրսը ժաժք է, մէ տըղամարդ հերոսաբար կանցներ մեջտեղից՝ ֆանառից (լուսարձակը) ձեռքին, բայց աչքերը փակ է ու կսեր. «Լողցեք, լողցեք. հըմի դվիժուկը միացնեն, լուս կեղնի»:

Ծիծաղաշարժ պահ մը, որ զարմանալիօրէն սիրտդ կը ջերմացնէ, երբ մարդկային բանականութենէ վեր բարձրացող յոյզը անգամ այսպիսի դժվարութեան մէջ ունակ է խնդացնելու...

«Տրալբուսի ֆոկուզները» և «Թագա տարին ու հին աղաթները» պատմութեանը

Յայաստանը այս օրերուն յայտնի էր քաղաքին իւրահատկութիւն տուող իր տրալբուսներով՝

Ինչպէս կսէ Լիլիթ.

«Ամերիկական ամենավտանգաւոր կառուցվելները գլուխները քարն էին տւել մեր կարմիր տրալբուսի թով:

Այդ օրերուն վատթարացած էր հանրակարգերուն շարժը, բայց տրալբուսները իրենց պատմական առաքելութիւնը կը շարունակէին ընել ու յոգնութիւնը շալկած անխոս ու անտրտունը կը տեղափոխէին քաղաքացիները դէպի աշխատանքի կամ տուն: Ու գրեթէ միշտ այնքան լեցուն, լեփ-լեցուն կըլլային անոնք, որ հագով ոտնաչափ տեղ մը կը գտնէիր ու գրեթէ բաց դռն դուրս

կախուած կը փորձէիր բարեյաջող տուն հասնիլ»:

Պատմութեանը մնացեալ նկարագրութիւնը կը ձգէ ձեզի, որ վստահաբար պիտի ըմբռնենք գիրքը ունենալէն ետք:

Իսկ ո՞վ կը կասկածէր Յայերուն, մանաւանդ Ամանորի եւ Սուրբ Ծննդեան տօներուն յատուկ հիւրասիրութեան ու առատածնունդութեանը:

«Թագա տարին ու հին աւանդութիւնները» կը պատկերեն հայ մարդուն այս կողմէն դիտուած առանձնայատկութիւնները ու յատկապէս գիւմրեցիին յատուկ հիւրընկալութիւնը ու ջերմութիւնը: Երբեք պիտի չզգայիր, որ իրենց օճախին մէջ կիսատ մնացած կեանքեր կան, իրենց հիւրասիրութեան չափն էլ իրենց սրտին պէս մեծ է ու ջերմ եւ թէւ «պատի պապայի» եւ կամ ժաժքի երախը կու գնացած մարդոց ու պոսիկներու լուսանկարները քեզի կը դիտէին, սակայն հրամցուած հացն ու ջուրը փափուկ կիշներ կոկորդէր, որովհետեւ սիրով դրած էր հիւրին առջեւ ու ինչքան ալ ամոնց յոյզերը պատերուն վրայ կախուած մնացին, ինչպէս՝ «Չվանին մնացած հույսեր» պատումին նկարագրութիւնն է, անոնք չչարացած ու կենսախիմը մնացին:


Երկրաշարժէն 30 տարի ետք պարզուող իրականութիւնն է բնութագրուած այստեղ բազմիմաստ ու նաեւ երգիծական հումորով, որ անգամ եւս կուգայ փաստելու անոնց անըմբռնելի լաւատեսութեան ուժը, մահը կեանքով շարունակելու բացառիկ կարողութիւնը, որ յատուկ է մեր ազգին:

Իսկ ահա վերջին պատմութեանը **«Կարմիր կոշիկներով սատանէն»** հոգեբանական զգացումներու, ցաւի, որմ այլեւս չի տեղադրուիր հոգիիդ մէջ, զազաքնակետին հասած նկարագրութիւնն է: Խտացած են մարդու, որպէս տիեզերքի բնական շնչող էակի յոյզերը ու ապրումները դուրս ելած է մարդը ինքզինքէն: Ոչինչ է աշխարհը. միայն սին օրերու անփնաստ շարան ու պայքարիւն անգամ չունի իմաստ, երբ չկան այլեւս ընտանիքդ, զավակներդ, կինդ, ընկերներդ, տունդ ու հայրենիքդ ծուխի ու փոշիի մէջ թաթախուած է, ու անկարող ես այս ամէնը հասկանալ ու մեջդ տեղադրել, բացատրութիւն անգամ չունիս...

Բարձր գեղարւեստական շարադրանքով Լիլիթ կը ներկայացնէ տղամարդու մը այս ապրումները, որոնք թէւ մարմնաւորուած են մէկ կերպարի մէջ, սակայն այդ ժամանակաշրջանի դէմքն էն: Եւ աշխարհին երեսին գոյութիւն չունի որեւէ այնպիսի չափման միաւոր, որ կրնայ չափորոշել ցաւի աստիճանը, քանի որ յոյզերու սանդղակը դուրս է պատկերացուած բոլոր սահմաններէն:

Գրքեր կան, որ կարդալէն ետք, որոշ ժամանակ անց, կուգես նորէն վերադառնալ ու վերընթերցել: Այս գիրքը ինձի համար կը պատկանի այդ շարքին ու թէւ ամէն անգամ պիտի նորոգուի ցաւին ապրումը, սակայն որպէս մարդ, հայ մարդ նաեւ պիտի ամրապնդուի ուժովդ, պիտի հպարտանաս տեսակովդ, պիտի գոտեպնդուիս գոյութեամբդ, քանզի, ինչպէս կսէ Լիլիթ, անգամ «Չինվորի սապոգներից հայրենիքի հոտ կուգայ...»:

Կամիլա ԵՐԿԱՆԵԱՆ- ՔԵՇԻՇԵԱՆ Պէյրուք 2018թ.



ԲԱՆԱՍՏԵՂԾՈՒԹՅԱՆ ՄՇՏԱՄԱԿ ԽՈՐՀՈՒՐԴՈՎ

Հայաստանում, որտեղ էլ լինես՝ անհմար է, որ մի հինավուրց եկեղեցու, մի Հրաշագործ Ավետարանի, մի հզոր ամրոցի պատմության չառնչվես: Եթե անգամ պատմության քարե մեմ մի բեկոր, թեկուզ մագաղաթի մի էջ կամ ամրոցի մեկ որմ պահպանված լինի: Հայաստանի այդպիսի վայրերից է Վահրամաբերդը:

Գյուղը կոչվում է միջնադարի հայ իշխան Վահրամ Պահլավունու անունով: Այս չքնաղ վայրում է խոյանում 10-րդ դարի Մարմաշենի վանական համալիրը: Այստեղ՝ իշխանական երբեմնի նստավայրում, զուլալ հովերի գրկում, աղոթալիք երկնի ներքո

ծնվել է Վահրամաբերդի պոետը՝ Հարություն Սարգսյանը: Մի խումբ մտավորականներով գյուղ գնալու առիթը բանաստեղծն էր և նրա ԳՐԱԿԱՆ 5-րդ արու գավակը՝ «Ուշացած խոստովանություններ» բանաստեղծությունների ժողովածուն: Գյուղի ակումբում հավաքվել էին գրողի համագյուղացիները, գիր ու արվեստ սիրող մարդիկ, բանաստեղծի հարազատները: Գյուղը լայնահուն սիրտը բացել ու շռայլորեն իր սերն ու գնահատանքն էր փոխանցում հայրենի շենի հող ու ջրով սնված, մարտական ուղի անցած բանաստեղծին: Երկուստեք նվիրական խոստովանություններ՝ հայրենի տան ու փոխադարձաբար, պոետի սիրո և կռվի կրակներով թրծված տողերով:

ՀՈՒՋԻՉ ԷՐ ԽՈՐՀՈՒՐԴՈՎ ԵՎ ՊՈԵՏԱԿԱՆ ՄՔՆՈՒՐՈՒՄ Լի էր Հարություն Սարգսյանի բանաստեղծության էներգիայով, գրական ցերեկույթի ողջ ընթացքում հնչեցին ազգային երգեր ու ոգեշունչ պարեր գյուղի շնորհալի երեխաների մասնակցությամբ: Պոետին շնորհավորեցին նրա սիրելի ուսուցչուհիները, որոնցից մեկը՝ բարեմադրանքի խոսքը տեսածայնով էր փոխանցել:

«Ուշացած խոստովանություններ» բանաստեղծությունների ժողովածուն ԱՆՊԱՐԺԱԿ ՍԻՐՈ ԳԻՐ Է՝ կյանքից դեպի կյանք՝ ապրածի, աստվածային Սկզբի փիլիսոփայություն: Սա վկայեցին նաև Հարություն Սարգսյանի գրչընկերները՝ բանաստեղծ Ռոբերտ Շախյանը, Մնացական Մուրադյանը:

Բանաստեղծին իր ողջույնի և շնորհավորանքի խոսքն էր հղել

ՀԳՄ Նախագահ բանաստեղծ Էդվարդ Միլիտոնյանը: ՀԳՄ Շիրակի մարզային մասնաճյուղի նախագահ, բանաստեղծ Անդրանիկ Կարապետյանը Գշեց, որ Հարություն Սարգսյանի բանաստեղծ և մարդ տեսակները նույնանուն են, նա նույնքան անկեղծ է, թե՛ մարդկային տեսակով, թե՛ գրով: Նա պոետիայում էլ ստեղծագործում և ապրում է առանց կեցվածքի՝ ինքն իրեն փնտրելով, երազելով մի ավելի կատարյալ աշխարհի մասին:

Բանաստեղծի կողքին են նրա հավատարիմ կողակիցը՝ Անահիտը, չորս արու գավակները, որոնցից երկուսը Հայոց ազգային բանակի սպաներ են: Գրական ցերեկույթի անակնկալը Հարություն Սարգսյանի թոռների անմիջական ելույթներն էին: Նրանք ընթերցեցին բանաստեղծություններ պոետի դարձյալ նոր լույս տեսած ՄԱՆԿԱԿԱՆ ժողովածուի ստեղծագործություններից:

Անդրանիկ Կարապետյանը բանաստեղծին հանձնեց ՀԳՄ վկայական գրական վաստակի համար:

Ոչ ոք հենց այնպես չէեռացավ դահլիճից: յուրաքանչյուրն իր հետ մի քնքուշ, մի խիզախ ու մի ապրեցնող տող տարավ, մի խորխոր մեղեդի, իսկ բանաստեղծը՝ ՍԻՐՈ ՄԵԾ ՉԱՓԱՐԺԻՆ՝ արարող մարդու համար լավագույն գնահատականը:

... Իսկ Նախասրահում Մինաս Ավետիսյանի «Արմենիա» որմնակարի արևային գույներն ու գծերն էին՝ արվեստի մշտամնա խորհուրդով:

Սոնա ԱՆՏՈՆՅԱՆ

ՏՈՂԻ ՄԵՐԿՈՒԹՅԱՐ Ե ԽՏԱՑՆՈՒՄ ԱՊՐՈՒՄՆԵՐԻ ՈՒԺԸ

Հարություն Սարգսյանի տողերը հայրենիքը բացահայտող միջոցներ են, որոնց առանցքը սերն է: Խոստովանությունը ինքնաարտահայտման ափերին մոտեցող նավ է, որի մեջ սպասումը առաջընթացի առաջաստն է, հավատի լույսը, որ ալիքից ալիք են փոխանցում ոգևորության ճալերը:

Իսկ երբ սերը դառնում է աշնան երազ, արարունով ծնված տողերը հուզում են մեզ նաև հուշի արցունքներով: Բանաստեղծը նայում է իր խորքը տողերի կայծկլտուն աչքերով, հասկանում, որ մոռանալու համար ուժ է հարկավոր, ինքնահաստատվելու համար՝ սիրո արծազանք: Հիշողության ծառից կախվում է քնարական մի տող. «Դու ինձ մոտ կգաս այրող համբույրով»:

Հարություն Սարգսյանի գրքերում կատարյալ տողեր և հուզիչ պատկերներ շատ կան, որոնք խոստովանության ճանապարհին վառվող լապտեր են: «Հագար բառ եմ գրել, ջնջել ես մի տողում», - սա ստեղծագործողի աշխատանքը բնորոշող բանաձև է, ու հեղինակին միշտ պահում է գեղեցկությամբ արբած ու լիցքավորված, չհոգնեցնող որոնումներով մղում դեպի իդեալի լույսը: «Կարոտը սիրով իր բույնն է հյուսում»:

Հայրենիքի զինվոր-բանաստեղծը «Հողի արցունքը» շար-

քում կատարում է նորանոր բացահայտումներ. «Ականջ սիրում է հերոսներ ու արյուն», «Թե չլինես այսքան քարեր, // Ինչպես կարդան պատմությունս», «Հողի արցունքն է աղբյուրից հորդում», «Խրամատն է քո տունը»:

Մարտական երգերը Հարություն Սարգսյանի քնարի գործը մասն են, որոնք տարաբնույթ ռիթմերով ամբողջացնում են զինվորական արշավների և պաշտպանական կռիվների ոգեղեն կոլորիտը: Հայի դարավոր անկոտրում ոգին է փոխանցվել մարտիկ բանաստեղծին, ով իր արիական շունչ տողերը գրել է ոչ միայն զրջով, այլև՝ արյունով:

Հողապաշտ բանաստեղծը հուզում է ընթերցողին նաև կարոտի քնարով, որը ոչ միայն սարսուռով, այլև ջերմությամբ ու կրակով է հյուսվում: Ինչպե՞ս էր լռում է, թե խոսում՝ տողի մերկությամբ է խտացնում ապրումների ուժը:

Կյանքը հեքիաթ դառնար այսօր, ես մանկանայի գոնե մեկ օր, Իջնեի վանքի ծորս կարոտ՝ Արահետով լեռի, քարքարոտ: Արիաճայի կանաչ ափին Մեքքա հենեի տաք ժայռերին, Կուրծքս թրջեր, հովաքներ Ալիքների ջրափռոշին:

Կարոտը նոր խորքեր է թափանցում հոգու ճառագայթով, բացում է երազի կապույտ ծաղկաբերթեր՝ արբշիռ լույսեր սփռելով կյանքի շարունակվող աստիճաններին:

Ռոբերտ ԵՍԱՅԱՆ



Եվ մահամերձն ալ կուգե երկու բան.

Նախ կյանքը, վերջը լացող միր վրան:

Պ. Դուրյան

Կաշաղակներն աղմկում են: Աղմուկը խանգարող է ու ուղեղը սողցող... Նրանց ծայրն ավելի է բարձրանում, ջղագրգռության հասցնում: Սև են նրանք. սև, սև, սև... Եվ այդ ծայրը մեզ տխուր, տխուր է դարձնում... Նորից աղմուկ՝ ջղագրգռություն: Փակել են նրանք պատուհանը, փակել արևի ճամփան: Իսկ քիչ հեռվում աղավմին է՝ ամբողջովին սպիտակ ու լույսերի մեջ: Կաշաղակները թռչում են նրա կողմը, կտցահարում աղավմուն: Սպիտակ կրծքից արյուն է կաթում կամաց-կամաց, կաթ-կաթ... Արյունը նրան չի սպանում, չի մեռցնում: Ներսն է ցավեցնում, սիրտը այրում...

Չմեռ է... Ցուրտ... Դուռն աղմուկով բացվում է, և սենյակը լցվում է գարնան շնչով: Նանեն է... Չայնը բարձր է, զիլ, ինքնավստահ... Խոսում է, աղմկում է, կարկաչում: Կենսախիմը գարուն է Նանեն, ծնունդ ցրտի միջից աչքերը բացած ծննդիկ... Միամիտ է Նանեն: Ցրտից չի վախենում, սառնությունը չի զգում. պատմում է այն, ինչը միայն ինքը պիտի գիտենար, ինչն իրենն էր ու իր գաղտնիքը:

Նանեն ուրիշ զորամասից է եկել... Նոր զորամասում պաշտոն ունի: «Հ...յան Նանե, 22. 12. 2014 թ.»։ Վարդագույն օրագիրը այսպես է թվագրել: Նոր կյանք է սկսվում Նանեի համար. բուժկետի պետ է: Ծաղիկներ է նկարել նոթատետրում, երկու կպած, իրար ամուր փարված մոմեր ու փոքրիկ, ծաղկի նման աղավմու պոչ, հա՛, աղավմու պոչ, որով հետև հաջորդ էջին էլ է նկարել, առանց ծաղիկների, մենակ ու կիսատ աղավմի: Երբեմն Նանեն բաց գիրք է, մեկ էլ՝ անծանոթ գրքի էջ: Հանկարծակի կարող է բորբոքվել, վիճել, հետո էլ հոնգուր-հոնգուր լալ, լալ բարձրաձայն ու անդադար... Ո՞վ գիտի՝ ինչու է լալիս, ո՞ւմ է բան ասում, կամ ո՞վ կհասկանա նրան ... Ջգացմունքային է չափազանց. չնչին ուշադրությունից ուրախանում է: Գեղեցիկ էր, նկատում էին իրեն... Հրճվում էր երեխայի պես...

Մի օր Նանեի մոտ ներարկիչներ էին տեսել...

Ու նորից կաշաղակներն աղմկեցին... Նորից թռան աղավմու սիրտը կտցահարելու, վերքը թարմացնելու և արյուն բերելու...

Լացեց, հուզվեց, բացատրեց իրողությունը: ՇԱՔԱՐԱՅԻՆ ԴԻԱԲԵՏ...

Քչերն իմացան, շատերը լռեցին, ու էլի չկարեկցեցին, էլի անտարբերության մատնեցին... Էլի ծնունդ ու ցրտի մեջ մնաց մենակ՝ սիրո ու ջերմության կարոտ...

Գարուն էր... Շիրակի պաղ գարուն... Ցուրտ է գարունը մենակ հոգիների համար: Նանեն հիվանդացավ թոքաբորբով: Մայրն ու տատը եկան խնամելու, ոտքի կանգնեց: Դեռ թույլ էր ու ապաքինվելու տեղ ուներ: Բայց գործեր կային, ծառայողական պարտականություններ...

Բժշկուհի էր, լավ աշխատող ու պարտավոր էր գնալ զորավարժությունների... Դեռ չապաքինված՝ զորավարժությունների գնաց:

Պոլիգոնում նեղացրել ու վիրավորել էին Նանեին: Ջրաավարժությունները կիսատ թողեց ու վերադարձավ զորամաս: Ճամփորդ էր, վարձով տունը հանձնել էր, իսկ նոր տուն չէր ուզում վարձել: Գնալու էր գործուղման... Օրերն էր հաշվում, գուցե այնտեղ մնար ու էլ չվերադառնար զորամաս: Ավելի բարձր պաշտոն կունենար, փոքր-ինչ համգիստ կլիներ, գուցե իր տեղը գտներ:

Մի անգամ Վաղոյի հետ ֆիլմ դիտելու գնաց, նորից հույսը արթնացավ, նորից իր սիրտ տեղը կլիներ... Կյանքը գույն կստանար... Երջանիկ կլինեին...

Սպասումը երկար էր, իսկ գործուղման գնալը ձգձգվում էր... Երբ օր մի տեսակ դեմքը ուռած էր: Երբ հարցրին, թե ինչ է կատարվում, խոսքը կտուրը գցեց, ասաց՝ անքնությունից է... Տրա-

մադրություն չունեի... Իրեն չէր հետևում, ուտում էր այն, ինչ ուզում էր, ինչը հաստատ գիտեր, որ հակացուցված է... Մեկին էլ ասել էր, որ իրեն քիչ է մնացել ապրելու, շատ քիչ... Տարօրինակի տեղ էր դրել ու ոչինչ չէր հասկացել...

Մի օր էլ հագիվ հասցրին Երևան... Կոմայի մեջ էր ընկել ու մի կերպ արթնացել... հանոգել էին, որ հաց ուտի... Նեղվել էր, երեսը դարձրել ու լացել... Վաղոյին էր ուզել... Ինչ-որ մեկը մոռաց գաղտնի լուր էր ուղարկել, որ Վաղոն գա... Եկել էր... Թափառել հիվանդանոցի բակում, թափառել ու լացել... Բայց ներս չէր մտել... Վախեցել էր, որ Նանեի մայրը հիվանդանոցում աղմուկ կբարձրացնի ու ներս չի թողնի... Կմեղադրեր, ու ներս չէր թողնի... Վերև բարձրանալն իմաստ չուներ...

Նանեն մեռավ՝ ջահել, սեր չվայելած, քնքանք չտեսած... Գարուն էր... Ցուրտ գարուն... Մայրը լացեց, մարդկանց ու իր բախտը անիծեց...

Մկտաց ու լացեց Վաղոն... Թաղումը հեռվից դիտեց... Մեռակ մնաց իր տխրության ու թափածի հետ: Եկավ զորամաս... Իր հետ վերցրեց Նանեի ծաղիկները, այն ծաղիկները, որ երկուսով էին աճեցրել... Իրենց սիրո ծաղիկները: Պատմեց իրենց տխուր սիրո մասին... Բաժանված էին, բայց միասին էին ապրում... Բաժանված էին, որովհետև միասին ապրելն անկարելի էր, մարդիկ չէին թողնում, խանգարում էին, որ միասին լինեին... Ո՞վ էր մեղավոր... Նանե՞ն... Հիվանդությունը... Չէին թողել, որ միասին լինեին... Գուցե Վաղոն կկարողանար հաշտվել Նանեի հիվանդությանը... Գուցե Նանեն ջերմության շնորհիվ կկարողանար դիմադրել

... Գուցե...

Ի՞նչ մնաց Վաղոյին... Սիրո ծաղիկը, որ պիտի գուրգուրի Նանեի փոխարեն և ծանր հիշողություններ...

Նանեից մնաց հիշատակ մի նկար ու հուշատետր... Վարդագույն գրքույկը, որի վրա խժբզել էր սևով... Սև, սև, սև... Սև ցավ...

27 տարեկանում էլ Նանեն չկար... Նոթատետրի մեջ գրել էր Հ. Սահյանի «Ինչ անեմ, մայրիկ...» բանաստեղծությունը.

**... Եվ իմ փոխարեն
Իմ ցավն զգացող
Ու լացող չեղավ:
Ի՞նչ անեմ, մայրիկ...**

Ի՞նչ անի մայրիկը... «Բա ես ի՞նչ անեմ, չկա՛ Նանեն, չկա՛ Նանեն...»: Մայրը տեսավ վերջին արցունքը ու թաց թաշկինակը... Ցավը Աստված տեսավ... Մխավները մարդիկ չներեցին, քո տխուր հոգին ու քո վիշտը Աստված տեսավ...

Մահիցդ հետո էլ քեզ չհասկացան... Ոչ էլ մորդ հասկացան ու նրա ցավը... Հիշատակդ չի թառամել... Մի անգամ բժիշկ Ձավենը քեզ երազին տեսավ... Դու անմեղ ժպտում էիր... Դու ժպտում էիր...

Կաշաղակներն աղմկում են, ուղեղդ սղոցում: Իսկ քիչ հեռվում աղավմին է՝ ամբողջովին սպիտակ ու լույսերի մեջ:

Նարինե
ԿԱՐԱՄԱՆՅԱՆ
(Քարհանյան)
Բան. գիտ. թեկնածու
16.04.2016



«ԵՐԳՈՂ ԱՐՅԱԽԸ» ԳՅՈՒՄՐԻՈՒՄ

«Հույսի, կարոտի, հավատի երկու ժամ...», այսպես ամփոփեց հիացումի ու երախտագիտության իր խոսքը ՀԳՄ Շիրակի մարզային բաժանմունքի նախագահ, բանաստեղծ Անդրանիկ Կարապետյանը: Եվ հոգեցունց համերգի ավարտին բեմից հնչած միակ սրտաբուխ խոսքը չէր սա. շուշեցի-գյուլների բանաստեղծ Ռոբերտ Եսայանը, կրկին Արցախում ու Շուշիում հայրենակարոտ ու վարանդասեր հանդիսատեսի մի բույլ ևս: Ընդհանրապես դա հիշում է չկար մեկը, ում աչքերը արցունքների թացից ու հուսո ճիչից չչոլային: Իսկ համերգի ավարտին ոչ ոք չէր ուզում լքել փոքրիկ վարանդացի-շուշեցիներին և, իհարկե, խմբի գեղարվեստական ղեկավարին՝ Համազգային հայ կրթական և մշակութային միության կենտրոնական վարչության աստեղապետ, տաղանդավոր երաժիշտ և խմբավար Զաքար Քեշիշյանին:

Երգ՝ հանուն տունդարձի կամ տունդարձը՝ երգով՝ մանուկների և պատանիների՝ վատահաբար վաղվա իրենց օրրանը շենացողների շուրթերից: Թրթռում, նրբին ու խորը, անասելի խորը,

նույնչափ հավատ ներշնչող ամենեցուն, ամենեցուն, ամենեցուն... Հային՝ հայ ոգում առանց դույզն իսկ բացառության:

...Հայ Արցախը, հայ Շուշին, հայ «Վարանդա» երգում է, և երգը հնչում է Շուշիի ճաղիտներում՝ կենսակի-կենսատու-ապրեցնող... հար... Եվ սա ամենակին էլ խենթ երազ չէ...

Համերգը կազմակերպվել էր Արևելյան Ամերիկայի Կիլիկյան թեմի առաջնորդարանի և Սուրբ Լուսավորիչ Մայր եկեղեցու հովանավորությամբ և Գյումրու քաղաքապետարանի աջակցությամբ:

«Շուշիի ազատագրումն ու «Վարանդա» մանկական, պատանեկան և երիտասարդական պետական երգչախումբը տարեկիցներ են: Շուշիի անկումից հետո «Վարանդա» երգչախումբը Ստեփանակերտի մեջ կազմակերպեց «Երգող Արցախ» երգչախմբային համերգաշարը: 2024 թ. համերգաշարը իրագործվում է Հայաստանում՝ /համերգի ծանոթագրություններից է/:

Համերգաշարն այն մասին է, որ Շուշիի երգը չի մեռնում, և երգող Արցախը երբեք չի մեռնելու՝ իբրև

հույսի, կարոտի և հավատի հավերժող ծայն...

Նույն ՆԻԿՈՂՈՍՅԱՆ

Ավելի քան երեսուն տարի առաջ, երբ պոռթկաց Արցախ աշխարհը, երբ պայթեց արցախյան շարժումը, երբ ոտքի կանգնեց համայն հայությունը, հայ կյանք մտավ մի ԲԱՌ, որ կրում էր ոգի և ուժականություն: Այդ ԲԱՌ-ի վրա խարսխվեցին հաջորդական հաղթանակներ: Այդ բառը իր խորհուրդն ուներ. հուսադրում, ներշնչում ու ոգեշնչում, գոտեպնդում էր ու միացնում, մի հայտարարի բերում հայերին, որտեղ էլ լինեին: Այդ բառը ԵՌԱՄԻԱՍՆՈՒԹՅՈՒՆ-ն էր, որ հնչում էր ոչ միայն իր բառարանային իմաստով: Երբ կորցրինք այդ ԲԱՌ-ի խորհրդից բխող մեր ազգային զգոնությունն ու միաժամանակ հեռացանք մեր ազգային արմատներից ու արժեհամակարգից, հեշտ եղավ մեզ մասնատել, սկի ու սպիտակի բաժանել, արցախցու-հայաստանցու, հայաստանցու սփյուռքահայի պիտակավորումով տրոհել:

Երաժշտիս համար այն բարեհունչ էր այնպես, ինչպես «Մաքուր եռահնչյուն»-ը և եմթադրում

էր ներդաշնակություն. ներդաշնակություն իրար հետ, ներդաշնակություն մեկ ընդհանուր տոնայնություն մեջ ու հզորություն. չէ՞ որ մեկ եռահնչյունը ավելի հզոր է, քան երեք առանձին հնչյունը: Պատահեց այնպես, որ մենք այժմ «մաքուր եռահնչյուն» փոխարեն ունենք այլ բան: Մեր եռահնչյուն երեք հնչյունները, թեև նորից նույն տոնայնության մեջ, սակայն այժմ խժալուր եռահնչյուն են կազմում: Ապրում ենք այն դաժան իրականության մեջ, որն ունենք ու միգրացիոն արժանի ենք մենք մեծերս՝ չափահասներս: Սակայն մեզ հետ այս նույն իրականությունն է ապրում մատաղ սերունդը: Նա, որ մեղքի ամենադույզն բաժինն իսկ չունի այս ստեղծված իրականության մեջ, սակայն ում «գլխին է ջարդվում» հետևանքների մեծ մասը: Նրանք, որ մի օրից մյուսը միանգամից մեծացան, պապեական տուն ու տեղ կորցնելով, ծնող ու եղբայր կորցնելով, վիրավորի հոգսերով ու առօրյա կենցաղային բեռան տակ ընկնելով՝ կորցրին մեկ իրենց մանկությունը: Հապրեցին այն:

Ահա երկրորդ տարին է, որ

Արցախից հեռու մենք հավաքվում ենք այս պայմաններում:

Հավաքվում ենք ու երգում, որ մեղմենք մեր հոգեխոցը, որ ապրենք վիշտը՝ չթողնելով որ այն մեզ ծնկի բերի: Որ մնանք այն տոնայնության մեջ, այն հայտարարի տիրություն, որտեղ մեր եռահնչյունները մաքուր են հիշվում: Որ նորովի ոգևորվենք ու ոգևորենք: Եվ որպես մեր վաղվա օրվա պայծառության առհավատչա՝ մեր մաքուր եռահնչյունները վերհիշեցնեն վերոնշյալ ԲԱՌ-ի խորհուրդն ու կարևորությունը: Երգում ենք, որ մեր մեջ վառ ու թրթռում մնա մեր Արցախ աշխարհը, որ առօրյան իր դաժան հեղձ ու կշռույթով այն չհանի ոչ մեր լեզվից, ոչ մեր մտածողության, որպեսզի ամրապնդենք արցախյան մեր կյանքի պայծառ հիշատակները, որ չխամրեն մեր երազանքները, որ չզիջենք մեր երազանքները հաջորդ սերնդին, այլ ամեն օր գործենք դրանց իրականացմանն ի խնդիր:

ԶԱԶԱՐ ՔԵՇԻՇՅԱՆԻ ԽՈՍԹԸ
Շուշիի «ՎԱՐԱՆԴԱ» երգչախմբի
«Երգող Արցախ»
համերգաշարի առիթով



ԳՐԻՆԵ ԲԱԳԵՅԱՆ ՄՇԱԿՈՒՄԸ ՇԻՐԱԿԻՄ (19-20 դար)

Կարինե Բագեյանի աշխատությունը նվիրված է Շիրակի գործվածքի մշակույթին, որը թեև մասամբ ներկայացվել է գեղարվեստական գործվածքի առանձին ճյուղերին վերաբերող տարբեր հեղինակների ալբոմներում ու հոդվածներում, սակայն համալիր և ամբողջական քննարկման չի ենթարկվել: Մենագրության մեջ նկարագրվել են ուսույնականության մեջ մտնող բոլոր արհեստները, որոնք ներառում են աշխատանքի բոլոր փուլերը՝ նյութի մշակումից մինչև բարդ ու բարձրակարգ բանվածքների պատրաստումը՝ կանգ առնելով տեխնիկա-տեխնոլոգիական, գեղար-

վեստական, կիրառական յուրահատկությունների վրա: Առաջին անգամ գործվածքը դիտարկվել է նաև որպես ոչ նյութական մշակույթի կրող, ինչը դրսևորվել է շիրակցիների ընտանեկան, համայնական հարաբերությունների մեջ և տոնածիսական կյանքում:


Աշխատության արդիականությունն այն է, որ ընթերցողին է ներկայացվում հայոց արտադրական մշակույթի այն հնագույն ու հարուստ ժառանգությունը, որն այսօր մեծավ մասամբ չի պահպանվել, ինչի արդյունքում ժամանակակից սերունդը՝ այդ թվում նաև մշակույթին առնչվողները, չեն ճանաչում այն, ուստի չեն տիրապետում գործվածքին վերաբերող եզրաբանությանն ու սխալ են գործածում մասնագիտական

բառամբերը: Այդ բացը լրացնելու համար կազմվել է մասնագիտական տերմինների բառարան, ինչը հնարավորություն կտա հստակություն մտցնելու ուսույնականության տերմինաբանության մեջ: Հետազոտությունն ընդգրկում է 19-20-րդ դարերը՝ ներկայացնելով գործվածքի հետ կապված մասնագիտական զբաղմունքների զարգացման գործընթացն ավանդական արհեստներից ու տնայնագործությունից մինչև խորհրդային արդյունաբերական ձեռնարկությունների ստեղծումն ու գործունեությունը:

Հետազոտության գիտական նորույթն այն է, որ մինչ օրս հայոց մշակույթում գործվածքն ու դրա հետ կապված արհեստներն ամբողջական ձևով ուսումնա-

սիրված ու ներկայացված չեն և այս աշխատությունն ամփոփում է գործել-հյուսելու հետ կապված բոլոր արհեստները, որոնք խմբավորվել են ըստ աշխատանքի գործընթացի հերթականության՝ հումքի մշակման, թել մանելու, բուն գործվածք հյուսելու, գեղարվեստական գործվածքի պատրաստման և գործելու հետ կապված այլ արհեստների: Յուրաքանչյուր զբաղմունք նկարագրվել է հաշվի առնելով նաև դրա ինչպես արհեստավորական, այնպես էլ տնայնագործական բնույթը:

Կարծում ենք՝ մենագրությունն օգտակար կլինի ինչպես գործվածքով զբաղվողների, ուսումնասիրողների, այնպես էլ թանգարանների աշխատողների և ուսանողների համար:



«Ալեքսանդրապոլի մշակութային կյանքը» հանդիսանում է եռապատման առաջին մասը /հաջորդիվ՝ «Լենինականի կերպարվեստը 1924-1991 թթ.», «Գյումրու կերպարվեստը 1991-2020 թթ.»/:

Աշխատանքը նվիրված է Գյումրի քաղաքի պատմական հին շերտի՝ Ալեքսանդրապոլի մշակութային կյանքի ուսումնասիրությանը: Սա ամբողջական հետազոտություն է, որը ներառում է պատմական, ազգագրական, թատերագիտական, մշակութաբանական, երաժշտագիտական, ճարտարագիտական, արվես-

տաբանական ոլորտները: Նման ընդգրկուն քննություն կատարելու համար ուսումնասիրել ենք մեծաթիվ արխիվային նյութեր և փաստաթղթեր, որոնք սիրահոժար մեզ տրամադրել են «Կուսմայրի» արգելոց-թանգարանը, Հիթոլոգոնց տուն-թանգարանը, ինչպես նաև անհատները:

Իբրև սկզբնաղբյուր օգտագործված են շուրջ չորս տասնյակ գրքեր, ամսագրեր և հոդվածներ՝ Ալեքսանդրապոլի պատմաաշխարհագրական նկարագրի, ազգագրության (Կ. Կոզմյան, Վ. Դուկասյան, Կ. Սեդրոսյան),

թատրոնի (Ռ. Մադոյան), գրականության (Կ. Դուրգարյան) ուսումնասիրության վերաբերյալ: Մինչ օրս չկա որևէ հակիրճ ձեռնարկ կամ հոդված՝ Ալեքսանդրապոլի գեղարվեստական կյանքին առնչվող:

Հետազոտությունը ներկայացնում է քաղաքի կազմավորման և զարգացման պատմությունը, վերելքի նախապայմանները, Ալեքսանդրապոլի կարևոր մշակութային միջոցառումների և իրադարձությունների նկարագիրը՝ սկսած XIX դ. սկզբից մինչև 1924 թվականն ընկած ժամանակաշր-

ջանը: Հուսով ենք՝ այն ոչ միայն կլրացնի գեղարվեստական կյանքին առնչվող բացը, այլև կամբողջացնի Ալեքսանդրապոլի՝ իբրև կարևոր մշակութային օջախի նկարագիրը:

Գիրքը լույս է տեսել ՀԱՄԱԶԳԱՅԻՆ հայ կրթական ու մշակութային միության Գյումրու գրասենյակի աջակցությամբ և Կատեա Քուշերեանի մեկենասությամբ:

Արաքս
ՄԱՐԳԱՐՅԱՆ
արվեստագիտ. թեկնածու

ԱՐԵՎՄՏԱՀԱՅԵՐԵՆ ԲԱՆԱՍՏԵՂԾՈՒԹՅՈՒՆ



ԿԻՆԸ ԱՍՏՂԵՐԵՆ՝ ԸՆԿՈՅՁԻ ՊԷՍ

Կանաչ թարմ ու լեղի
Քաղցրանալու երազը ամուր
բռնած
Բջիջներուն մեջ

Աշունը քաղեց զարնանացունը
Բայց չմահացաւ
ճերմակ մնալու գաղտնիքը մեջը
Փնտռողին համար:

ՄԱՐՈՒՇ ԵՐԱՄԵԱՆ

ԱՍՏՂԵՐԵՆ ԻԶԱԾ ԿԻՆԸ

Քալել չէր գիտեր
Ամբողջ կեանքը թռչեր էր
Երազները թելերու պէս հագած

Արթնցեր էր լուրթի երանգներուն
մեջ
Վարգեր հովերուն ետեւէն
Եւ համտեսներ էր արելը

Իջեր էր
Եւ քալել չէր գիտեր

Քալել չէր գիտեր
Բայց կը թռչկոտէր գագաթ
գագաթ
Կը փնտռէր հոտը մանկութեան
անցած

Իջեր էր գրկած
Աստղերուն փայլքը
Անոնց բոցը պաղ

Չկար լեռը սեւ
Ու չկար գագաթ
Միւս աստղերուն հետ թառելու
համար

Աստղերը թելաւոր իջան
Թաց աւազներուն
Եւ անոնց փայլքը
Լուսաւորեց կատաղութիւնը
ալիքներուն

Իսկ կինը
Որ ալ սորվեր էր քալել
Զսպելով ցաւը անտանելի

Դրաւ գլուխը փրփուրներուն
Եւ գրկած երազը սեւ
անտառներուն
Քուն մտաւ
Երազելով վարդայեղեղ
արշալոյսը:

ԱՍՏՂԱՒՈՐ ԿԻՆԸ ՈՐ ՍԻՐԱՅԱՐՈՒԵՐ ԷՐ ՀՈՂԻՆ

Իջաւ թեթեւ ծփանքով
Հողին ուր այնքան գաղտնիքներ
կային

Բայց եթէ կեանքը
Չի դիմանար լռութեան
Հապա ինչպէս դիմացաւ
գաղտնիքներուն
Աստղածորան գիշերներուն
Սեւ անտառներու կորուստին

Աստղաւոր կինը
Իջաւ
սուգունեցաւ հողին
խառնեց արիւնը կանաչին
Եւ սպասեց

ԱՍՏՂԱՓՈՇԻ

Ամէն գիշեր
Աստղերէն ծնած կինը
Կը մօտենայ ծանրօրէն գինով
Աստղիկին
Կը հագնի անոր յոգնութիւնը
Տառապանքը
Եւ իր աստղային հանդերձները
Անոր տուած
Կը հսկէ քունը

Կը մօտենայ որդեկորոյս
Անահիտին
Եւ անոր զակկին դէմքը հագած
Կը ցօղէ ցաւը

Կը մօտենայ շատերուն
Աստղափոշի ցանելու
Եւ անոնց ցաւը գրկած
Կը վերադառնայ
Սեւ անտառներու մխիթարանքով
Ինքզինք լուալու:



ՍԱՐԳԻՍ ՔԷԼ ԽԱՇԵՐԵԱՆ ՊԷՅՐՈՒՅ – ԼԻՔԱՆԱՆ


ԶԱՐԹՆՈՒՄ

Եկուր մայր իմ
հոգիս այսօր կոկոխի կուզէ
ամէն առտու թողած անկողինիս
պէս

այս օր
մէջս ննջող մանուկը
արթնցաւ:

ՄԵՆՔ ԲՈԼՈՐՍ

Մենք բոլորս ջրվէժ
մայրս շատրուան
մենք բոլորս վայրէջք
մայրս թռչք
մենք բոլորս ժամանակաւոր
մայրս մշտական
մենք բոլորս տերեւաթափ
մայրս ծլարծակում
մենք բոլորս ցոլացում
մայրս հայելի
մենք բոլորս վերոյիշեալ
մայրս մենք բոլորս:



ՓԱՆՈՍ ԳԵՐԳԵՅԱՆ

ՀԱՅՈՑ ԱՐՔԱՆ

Եթէ խորհիս,
Թէ հողն է լոկ մեկնակետը,
Ուրկէ օր մը թելեր առած
պիտի թռչիս աստղերն ի վեր,
Դու՛ն կը գտնես քու կորուսեալ
դիմագիծը
Ու կ'ըմբռնես թէ ինչու
Արշակունեաց Հայոց արքան
Անյուշ բերդի նկուղին մէջ
ամէն անգամ երբ կը կանգնէր
Հողին վրայ Հայաստանի,
Կը շողային աչքերը կոյր,
պայծառութեամբ լուսածագի ...

Թիթեռի նման
թեթեւ կը զգայինք
Երբ հովը մեզ կը մղէր
մեր ճանապարհին.
ճամբեգրի
Ցօղունները եւս,
Հովու շոյանքէն տարուած
մեր քայլերուն զուգահեռ
Կը թեքէին.
Հիմա,
փոթորիկներ կը խաչածելեն մեզ
մեր ճանապարհին.
հոգի՛ս, նմանի՛ր այն թելաւորին,
որ թռչիլ գիտէ:



ԳԵՈՐԳ ՊԵՏԻԿԵԱՆ

ՄԻ՛ ԱՐԹՆՑՆԷՔ...

Լուսաւոր երաժշտութեան նման,
Երազներուս նկարներուն
կարօտովը,
Միտքս տառապող հին ցաւերով,
Հոգեկան տեւական պոռթկումով
քնացած,
Մի արթնցնէք.
Թող երազեմ յարութիւնը ցեղիս:
Դարերու կնճռոտ ճամբաներու
վրայ,
Ազգիս էջերէն ջնջուած
պատմութիւններով,
Հերոսներու արեան մէջ
թաթխուած դրօշակով,
Իբրեւ միակ ճամբորդը
երազներուս.
Մի՛ արթնցնէք.

Թող երազեմ յաղթանակը ցեղիս:
Միտքս տառապող ազգիս հին
ցաւերով,
ճակատագրի քովէն անցնող
ապրումներով,
Ապերախտ աշխարհին մէջ յոյս-
լոյս փնտռելով,
Քալելով օրերուս կաղ շարանով.
Կը խնդրեմ, մի՛ արթնցնէք.
Թող երազեմ գիտակցութիւնը
ցեղիս:
Կուրծքիս վրայ աղօթք մը
սեղմելով,
Արդարութեան եւ խաղաղութեան
կանչերով,
Իբրեւ թուղթի եւ գրիչի մոլի,
Միշտ ճշմարտութիւն որսալով,
Մի արթնցնէք.
Թող երազեմ միասնութիւնը
ցեղիս:
Հաւաքելով մտքիս բոլոր թելերը,
Եւ սրտիս խոր տրոփումով,
Նոր լոյսին բացող մտքերով,
Առանց ոսկեհունչ բառերու,
Ձիս արթնցուցէ՛ք, կը խնդրեմ.
Արդ, երազած եմ ազգիս
նոր արշալոյսը կրկին:



ՅԱԿՈԲ ՆԱԼԴԱՆՏ ՏՏՏԵԱՆ

ՅՈՒՂԱՆ ՆԵՐՎԱՅ ՉԷՐ

Վերջին ընթրիքին Յուդան
ներկայ չէր
Յիսուս շատ երկար սպասեց
անոր
բայց Յուդան չեկաւ

Գեթեմանի պարտեզի խորքը
ծիթենիներու լայն ճիւղերու տակ,
լրիւ զրահով բազում զինուորներ
լուռ սպասեցին մահուան
համբոյրը

Երբ արշալոյսին աքաղաղը
կանչեց
Պետրոս զղջաց,
որ երեք անգամ ան չէր ուրացած
իր Տիրոջ սիրած

Երկար եւ լարուած սպասումի
մէջ,
երկշոտ Կայափան իր սուղ,
մետաքսեայ
պատմութեան լայն
չկրցաւ պատռել,

Եւ Պիղատոսը ձեռքերը սոթթած
սպասեց երկար որ ձեռքը լուայ,
դատէ քմահաճ եւ աժանօրէն
անցնի պատմութեան
եւ դառնայ անմահ

Եւ գող Փարապան
հռոմէական աղտոտ եւ խոնաւ
բանտախոցին մէջ
անշուք մահացաւ
անհետք եւ... հիւանդ
երկու աւազակ

որոնք խաչուեցան այդ Ուրբաթ
կէսօր
անոնցմէ մէկն այդպէս ալ դրախտ
երբեք չտեսաւ
Եւ տիրոջը հետ
ան ընթրիք չըրաւ
Այլ ընկերոջ հետ
Դժոխքի փարթամ
ցոփ միջավայրի աղմուկներու
մէջ
Ուրբաթ երեկոն ըմբռնեցին
Եւ Տէր Աստծուն
խոր փառք յայտնեցին

Յովսէփի մոփ-մոր դամբարանն
ալ
ժամանակաւոր հիւր մը
չըմղունեց,
որմէ յարութեան լոյս եւ
ճաճանչներ
պիտի դուրս չողար

Յովհաննէսն ալ Աստուածամօրը
իբրեւ իրեն մայր
բնաւ չճանչցաւ
Եւ Մարիամն ալ իր Միածինի
կորուստի ցաւով
չիրկիզուեցաւ:

Թովմասը մնաց անշուք
առաքեալ
Եւ չօշափեց մեր Տիրոջ
խորունկ,
լոյս սպիները:

Հասարակ համբոյր
հոսքը պատմութեան
այն այդպէս փոխեց

Վերջին ընթրիքի երեկոյէն ետք
Մեր Տէր Յիսուսն ու առաքեալ
Յուդան
Ոչ ոք չտեսաւ:



ԱՐԱՄ ՔԵԹԵՆՃԵԱՆ ՊԼԱՂԱՏ-ԻՐԱՔ

ՄԱՍԻՍՆ ԵՄ ԵՍ

Դեռ աշխարհներ կեանք չառած.
Դեռ երկինքը մթագնած.
Դեռ անդունդը խաւարած
Ու երկիրը անձեւուած.

Դեռ ջուրերը չզատուած.
Լիճ ու ծովեր չկազմուած.
Դեռ Ադամը չստեղծուած
Ես կանգնած եմ սիգապանծ...

Ես այնտեղն եմ, ուր Աստուած
Արքայութեանն է բազմած.
Նոյեան Տապանն է հանգչած
Եւ մարդկութիւնը սերած...

Սակայն, հայրն եմ ես հայուն.
Վառ հոգին եմ չչիջած.
Սիրտն ու կամքը չմեռած...
Ես Մասիսն եմ, լեռ կենաց:

Էջը կազմեց
Նունե ՆԻԿՈՂՈՍՅԱՆԸ

Հրատարակված է ՀՀ ԿԳՄՍ նախարարության աջակցությամբ:

Լրատվական գործունեությունն իրականացնող՝
Հայաստանի գրողների միության Շիրակի մարզային
մասնաճյուղ:
Հասցեն՝ Շիրակի մարզ, Գյումրի, Գորկու 62
Վկայական N 01Բ 001543

տրված է 21.03.2005թ.
հեռ. (094) 53 44 64
խմբագրական խորհուրդ
Գլխավոր խմբագիր՝
Ռոզա Հովհաննիսյան

Համակարգչային ձևավորումը՝ «Էլիտարդ Պրինտ» ՍՊԸ
Տպագրված է «Վան Արյան» հրատարակչատան
տպարանում
Տպաքանակը՝ 500
Ծավալը՝ 2 տպագրական մամուլ